

弘

簡

錄

弘簡錄卷二百四十九

附載 突厥

始畢

處羅

頡利

突利

弟結社率

思摩

泥孰

車鼻

泥孰匐

伏念

溫傳

骨咄祿

默啜

默棘連

登利

葉護

白眉

突厥阿史那氏自啓民可汗備載隋書隋末天下大亂人民多往依始畢可汗竇建德薛舉劉武周梁師都李軌王世充高開道之徒悉臣尊之控弦百萬疆盛古所未有高祖起太原遣劉文靜往聘自爲手啓卑辭厚禮欲與和親資其士馬舉義兵迎隋主始畢得書嘆曰隋主爲人我所盡知若迎以來必害唐公

且擊我無疑苟唐公自爲天子我當助之使者七日而返卽遣
特勒康稍利獻馬二千兵五百來會約入長安民衆土地入唐
金帛子女歸可汗京師平帝遣鄭元璠遺以女妓金帛武德元
年遣骨咄祿特勒來朝帝宴之太極殿爲奏九部樂引升御坐
前後賞賜不可勝計是歲始畢牙帳自破帝問蕭瑀引魏文帝
幸許城門無故壞爲況時可汗自恃功高益驕倨每遣使至長
安橫恣帝以中原未定頗優容之二年自將度河至夏州與梁
師都合又佐劉武周以五百騎入句注將侵太原果發病死帝
爲舉哀長樂門遣使赴弔賻物三萬段于什鉢苾勿立啓民可
汗第二子俟利弗設

刑部掌兵
言謂之設

是爲處羅可汗

處羅立後頻遣使朝貢常語左右我先人啓民兄弟爭國賴隋
以存乃於竇建德所迎隋蕭后及齊王暕之子政道立以爲王

居之定襲以奉隋後凡中原人役者悉隸之行其正朔有衆萬餘置官屬秦王討武周處羅遣弟步利設引騎二千會并州總管李仲文出迎勞之留三日多掠城中美婦女仲文不能制復謀取并州卜之不吉牙內兩血三日羣犬夜號求之不見無何亦發疽死遣使入告罷朝一日遣百官就館弔其使以子郁射設阻弱立第三弟咄苾是爲頡利可汗

頡利始爲莫賀咄設牙直五原北薛舉陷平涼與進和帝患之遣光祿卿宇文歆往賂使與舉絕并說還隋五原太守張長遜所附五城皆見聽卽發長遜所部會秦王軍郁射設因太子建成議廢豐州并割榆中地遂以所部萬帳入處河南以靈州爲塞封什鉢苾爲突利可汗義成弟楊善經亦依突厥與世充使者王文素共說頡利頡歲入寇倚其父兄餘資兵銳馬強書辭

悍嫚方以經略天下特爲屈禮贈賚不費食求無厭武德四年
率萬騎與苑君璋合寇鴈門定襄王胡大恩擊却之執我使者
蘇瓌鄆元璿長孫順德帝亦因特勒熱寒等報之又寇代州敗
總管李孝基略河東犯原州穿延州塞諸將與戰不勝五年還
順德等請和特釋其使厚賜還之時突厥饑大恩言馬邑可圖
詔與獨孤晟往擊後期不至反爲所圍大恩陷沒死士卒數千
入寇忻州爲李高遷所破復以萬人從劉黑闥擾山東殘定州
尙未得志大發十五萬騎入鴈門圍并州鈔汾潞男女五千分
數千騎轉掠原靈間上遣皇太子并秦王將兵出幽蒲道擊之
李子和趨雲中掩其後段德操出夏州阻其歸與并州總管李
神符戰汾東斬首五百取馬二千汾州刺史蕭顗俘其衆五千
俄陷大震關與洪州總管宇文歆戰于崇岡靈州楊師道戰于

三觀山定州雙士洛戰于恒山將軍魏道仁安興貴戰于甘州
皆敗之獲馬駝數千方引出塞又明年與黑闥君璋等復寇定
匡原朔等州帝遣太子復屯北邊秦王屯并州破其代北一屯
進擊渭幽二州取馬邑請和歸之迎寇原與朔州總管高滿政
秦武通敗之入代地不勝更與君璋合攻隴州及陰樂城分擊
并地秦王與元吉屯幽州道以備君璋與突厥出入原朔擊掠
忻并騷然不靖八月頡利合突利起兵自原州連營而南所在
震恐秦齊二王拒之次幽州適關中霖潦饑道阻絕忽遇萬騎
奄至陣五龍坂挑戰舉軍失色秦王馳百騎掠陣大言國家於
汝無負何故深入我秦王也自來與可汗決若論多寡我纔百
騎欲戰卽戰徒廣殺傷無益頡利笑不答故縱反問語突利曰
爾往與我盟急難相助何無香火情耶亦不對頡利始見兵少

疑其有謀及聞突利語大忌卽遣使者來言王母苦我索戰將
與王議事耳時突利亦不欲戰頡利無以彊之乃遣夾畢特勒
阿史那思摩請和帝許之突利自託於王爲昆弟思摩見帝引
升御榻頓首辭帝曰我見若猶頡利也乃聽命會大雨弓弛遂
解而還久之遣使願款北樓關請互市帝大會羣臣問所以備
邊者將作大匠丁筠請五原靈武置舟師於河以扼其入溫彥
博請爲長塹如元魏遏匈奴帝然其計使桑顯和塹邊名江南
船工治戰艦復置十二軍怒曰往吾以天下未定厚於突厥待
以敵國禮豈期收約今將擊滅之母事姑息命有司更所與書
爲詔敕八年頡利攻靈朔代州都督蘭暮與戰新城敗績遣張
瑾屯石嶺李高遷屯大谷泰王屯蒲州道瑾未至突厥已踰嶺
圍并州攻靈州轉擾潞沁命李靖出潞州道任瓌屯太行瑾戰

大谷收績行軍長史溫彥博陷于賊鄆州都督張德政死之遂
攻廣武爲李道宗所破其弟欲谷設掠綏州刺史劉大俱敗之
請和而去又敗并州數縣入蘭鄯彭州諸屯俄寇原州折威將
軍楊屯擊之且發士屯大谷九年攻原靈圍涼州都督李幼良
敗之進犯涇原靖與戰引去寇西會州圍烏城翔祥隴渭間柴
紹破之秦州斬一特勒三大將首千級大不得志請和不耻七
月自將十萬騎襲武功京師戒嚴攻高陵尉邈敬德與戰獲俟
斤阿史德烏沒啜俟斤斬首千餘級遣謀臣執失思力入朝以
覘我因誇二可汗兵百萬今至矣時太宗卽位諭以常與可汗
面約爾何得背之且義師之初爾父子身從我遺賜玉帛至多
何妄以盛強自誇朕今當先戮爾思力懼請命蕭瑀封德彝皆
諫欲以禮遣帝不許繫於門下省躬率高士廉房玄齡將軍周

範等馳六騎出玄武門幸渭上與可汗隔水責其負約羣部見帝皆驚下馬列拜俄獻馬三千匹羊萬頭帝不納詔歸所俘於我徐引還貞觀元年薛延陀回紇叛野古諸部皆叛復值大雪羊馬凍死部下多饑懼王師邀險卽引兵入朔州境聲言會獵羣臣請乘其釁伐之帝以天子不可效匹夫爲不信旣與之盟豈利其災取之必須無禮於我乃伐之耳明年突利自陳求救帝因有昆弟約詔周範壁太原經略之秦武通以并州兵馬隨便應接頡利亦擁兵窺邊杜如晦諫曰彼常負約今亂而擊之侮亡之道也帝謂彼國盛夏而霜五日並出赤氣滿野天不祐也六畜多死地不祐也葬皆起墓背祖父命鬼神不依也內與突利不睦親不和也有是四者突厥必亡當爲公等取之突厥俗素質略因得文士趙德言才其人稍專國政自是不周歲興

師入邊下不堪苦又委信諸族翻覆不信號令無常哀歛苛重
諸部愈貳三年薛延陀自稱可汗遣使來貢九俟斤以衆降拔
野古僕骨同羅諸部霫奚果長皆來朝詔遣李勣出通漠道李
靖出定襄道柴紹出金河道李道宗出大同道衛孝節出恒安
道薛萬淑出嚙武道凡六總管師十餘萬皆受靖節度以討之
道宗戰靈州俘人畜萬計突利及郁射設蔭奈特勒帥所部來
降捷書夜至帝語羣臣往者國家初定太上皇以百姓故詭臣
突厥朕嘗痛心疾首思刷其耻今天誘諸將所向輒克朕其遂
有成功乎四年正月靖進屯惡陽嶺夜襲定襄頡利驚遁徙牙
磧口其將康蘇密等以隋蕭后及楊正道降中書舍人陽文瓘
言隋人嘗密通書於后請劾治帝謂天下未一人猶思隋今反
側旣安何足治耶頡利窘走保鐵山兵猶數萬今思力陽爲哀

言謝罪請舉國內屬帝詔唐儉安脩仁等持節慰撫靖乘其懈
襲擊破之盡獲其衆頡利獨騎千里馬將奔啓民命蘇泥失爲
張寶相所擒其國遂亡盡復定襄恒安地斥境至大漠矣頡利
至京師倂告太廟帝御順天樓見之陳仗衛士民縱觀數其五
罪第一不發兵助隋使絕其廟社血食二背德亡義棄信援邊
三恃強不戢部落携怨四賊人民暴不祿五許其和親遷延自
遁朕殺爾非無名顧渭上之盟未忘故不窮責乃悉還其家屬
館于太僕廩食之思結俟斤以四萬衆降欲谷設奔高昌旣而
亦來降伊吾城長素臣突厥舉七城以獻因其地爲西伊州詔
有司設祭死者長城之南暴骨如丘爲瘞藏之又遣使者以金
帛贖男女沒者八萬口還爲平民久之帝憐頡利無聊嘗與家
人悲泣狀貌醜瘠以統州負山有射獵之娛拜爲刺史辭不肯

往授右衛大將軍賜美田宅其子疊羅支有至性舍京師日得
品物供其母後不得給輒不敢嘗帝聞嘆曰天象仁孝厚賜之
仍給母肉八年頡利死贈歸義王諡曰荒從突厥俗火化起冢
葬于瀚東其母婆施之媵臣胡祿逯官吐谷渾邪者哀慟自殺
帝異之贈中郎將葬旁詔岑文本刻其事于墓碑俄蘇尼失
亦以死殉尼失始畢時爲沙鉢羅設帳部五萬牙直靈州西北
妾性雄赳以仁惠御下人多歸之頡利政亂其部獨不貳號小
可汗後亦舉衆來降授北寧州都督右衛大將軍封懷德王漠
南地遂空時其下或走薛延陀或入西域而來降者尙十餘萬
詔議所宜帝主溫彥博語度朔方地自幽屬靈州建順祐化長
四州都督割頡利故地左置定襄右置雲中都督府統之掘其
豪爲將軍郎將者五百人奉朝請者百員入長安自籍者數千

戶

突利初爲泥步設妻隋淮南公主以主契丹靺鞨部樹牙直幽
州比管屬東方之衆時延陀設主延陀部步利設主霫部統特
勒主本部斛特勒主斛薛部以突利斂取無法下多不附故薛
延陀奚霫等皆內屬頡利遣擊之大敗乘輕騎走囚笞之突利
怨望及頡利衰驟追兵於突利不肯從因起相攻來降帝禮見
良厚輟膳以賜之語左右曰古爲國者勞已以憂人則系祚長
役人以奉已則亡今突厥喪亂山可汗不君雖至親不自保觀
彼之亡我不可以無懼設有不逮禍可紓乎貞觀四年拜右衛
大將軍封北平郡王食戶七百俄爲順州都督使率其下就部
勅以毋相侵掠長爲藩輔突利頓首聽命五年徵入朝至并州
病卒年二十九帝爲舉哀亦詔文本誌其墓子賀邏鶻嗣突

利弟結社率貞觀初入朝歷授中郎將充宿衛十三年帝幸九成宮陰結種人謀反欲劫賀邏鶻北還相與夜犯御營踰第四重幕引弓亂發殺衛士數十人折衝孫武開率兵奮擊乃退北走殺廐人盜馬欲度渭爲微邏所擒斬首赦賀邏鶻投嶺外帝始思魏徵言處突厥于國非是乃更立武德初數奉使和順郡王思摩爲乙彌泥孰俟利苾可汗賜姓李氏樹牙河北悉徙種族以還故地

思摩亦頡利族咄六設之子啓民初奔隋磧北諸部常奉爲可汗歸後乃罷爲人閒敏善占對始畢處羅皆愛之然疑其非阿史那種故但爲夾畢特勒而不得爲設後與頡利俱禽授右武侯大將軍化州都督令統頡利故部居河南改懷化郡王及是將徙內畏薛延陀不敢出塞帝詔司農卿郭嗣本持節賜延陀

書言本朝禮義未始滅人國以顏利殘暴伐而取之本非貪土地人民故處降部於河南今復以思摩爲可汗還其故疆令主磧北延陀居磧南各守境土無相鈔犯有負約者朕自與兵誅之思摩乃行帝爲置酒語以蔣一草木見其滋廕且以爲喜況養爾部人息爾馬羊今復舊廷見爾塚墓思摩泣下奉觴上壽言所以存骨報恩之意詔禮部尙書趙郡王孝恭築壇河上受之以冊并賜鼓纛又詔左屯衛將軍阿史那忠左武衛將軍阿史那泥孰爲左右賢王相之時延陀亦恐其衆奔亡度磧勸兵以待見使者至拜謝曰謹奉詔貞觀十五年思摩帥衆十餘萬勝兵四萬馬九萬匹始渡河牙於故定襄城其地南大河北白道畜牧廣衍遣使來謝願世世爲國護守北門居三年復不能得衆下多攜背因暫入朝願留宿衛更拜右武衛將軍從伐遼

中流矢還卒贈兵部尙書夏州都督陪葬昭陵築墳象白道山
爲刊其勞碑於化州

泥孰蘇尼失子始歸國妻以宗女出塞未久思慕唐國見使者
必流涕復許入侍思摩殘衆稍南渡河分處勝夏二州帝將伐
遼或言突厥方居河南請必無東帝曰夫爲君者豈必貴有猜
貳有陷無道舉天下皆叛非止荒遠朕聞突厥之亡內河南以
振瞻之彼不近走延陀而遠歸朕懷朕深矣自今五十年必無
他患其言皆驗後突利部人車鼻可汗盜有思摩之地

車鼻名朔勃世爲小可汗其人沈果有智數衆頗便附薛延陀
畏逼將殺之率所部遷居金山之北三垂斗絕惟一面可容車
騎壤土寬博有勝兵三萬自稱乙注車鼻可汗距長安萬里西
爲邏祿北結骨皆并統之時出寇掠值延陀衰車鼻勢遂益

張貞觀二十一年遣子沙鉢羅特勤獻方物詭請入朝帝遣雲
麾將軍安調遮右屯衛郎將韓華往迎至則意變華與葛邏祿
謀共劫之車鼻覺令子陟苾特勤來聞華等被殺帝怒遣右驍
衛郎將高侃發回紇僕骨兵擊之車鼻攜愛妾走追至金山獲
之獻于京師高宗貴以無親不忠罪當死今特釋之獻俘社廟
引見昭陵拜左武衛將軍賜居第詔處其衆勸督軍山建狼山
都督府統之子羯漫并菴鑠俱拜左屯衛將軍建新黎州使領
其衆自此突厥盡爲封疆之臣乃置單于都護府領狼山雲中
桑乾三都督蘇農等二十四州瀚海都護府領金微新黎等七
都督仙夢賀蘭等八州擢首領爲都督刺史麟德初改燕然爲
瀚海都護府領回紇并磧以北蕃州徙故瀚海都護府於古雲
中城號雲中都護府領磧以南蕃州雲中者義成公主所居李

靖常徙突厥羸破數百帳居之以阿史那德爲長衆稍盛請以諸王遙統改爲單于大都護府以殷王旭論爲都護東封都督葛邏祿叱利等三十餘人皆從勒名於封禪碑

調露初單于溫傳奉職二部反立阿史那泥孰匄爲可汗二十四州皆叛應之詔遣單于大都護府長史蕭嗣業左領軍衛將軍苑大智右千牛衛將軍李景嘉討之恃勝不設備會雨雪士輒寒反被掩襲大敗殺略萬餘大智等收餘卒行且戰得免嗣業坐流桂州餘免官更拜裴行儉爲定襄道行軍大總管率太僕少卿李思文營州都督周道務西軍程務挺東軍李文陳衆合三十萬往討詔右金吾將軍曹懷舜屯并陘右武衛將軍崔獻屯絳龍門明年行儉與戰于黑山大破之每突厥入塞有雀南飛及是墮靈夏間悉無首泥孰匄果亡其下斬首以降併擒

奉職還餘衆保狼山復掠雲州都督竇懷哲程務挺逐出之
永隆中溫傳部又迎頡利族子伏念於夏州渡河立爲可汗諸
部響應明年寇原慶二州復詔行儉爲大總管懷舜文暕副之
謀者紿言餘衆保黑沙饑甚可取懷舜信之輕兵倍道至黑沙
不見敵得延陀餘部降之引還遇溫傳與戰殺傷相當行儉壁
代州陁口縱反間使相疑貳因遣兵擊敗之伏念走與懷舜戰
士卒多死懷舜殺牲與盟始免伏念留輜重妻子保金牙山以
輕騎將裝懷舜會行儉遣將掩其輜重北還無所歸乃北走保
細沙行儉山不意縱單于鎮兵躡之惶駭不戰伏念使執溫傳
間道詣行儉降送京師斬于東市

永淳元年頡利族骨咄祿乃雲中都督舍利元英部世襲吐屯
因伏念敗嘯亡散保總材山治黑沙城有衆五千盜九姓畜馬

稍彊大自立爲可汗以弟默啜爲殺咄悉何爲葉護適單于長
史王本立所囚阿史德元珍請還諭諸部以贖罪至卽降咄
祿以爲阿波達干悉屬以兵寇單于府北鄙攻并州殺嵐州刺
史王德茂分掠定州北平刺史霍王元軌擊卻之又攻媯州圍
都護府殺司馬張行師攻蔚州殺刺史李思儉執豐州都督崔
知辯嗣聖垂拱間連寇朔代掠吏士詔以程務挺爲單于道安
撫大使左玉鈴衛中郎將淳于處平爲陽曲道總管廕戰忻州
不利死者五千更以韋待價爲燕然道大總管討之元珍因攻
突騎施戰死明年咄祿入昌平黑齒常之擊卻之復入朔州境
與常之戰黃花堆又敗追奔四十里遇磧右監門衛中郎將
樊寶璧欲幸取功密構謀出塞二千里將至漏言敵得整衆出
皆死戰大敗寶璧跳還舉軍沒武后怒誅寶璧改骨咄祿口不

卒祿天授初死其子幼弟默啜自立爲可汗

默啜既立爲可汗長壽二年攻擾靈州后命薛懷義等率朔方等道十八將軍出塞擊之不克敵還俄詔王孝傑代爲行軍總管默啜請擊契丹反者李盡忠自效詔可授左衛大將軍歸國公賜物五十段命閻知微往使開爲遷善可汗間方出兵合盡忠死襲擊松漠部落盡得李萬榮妻子輜重后美其功復詔知微持節開爲特進誦跌利施大單于立功報國可汗未及命攻靈勝二州縱殺略爲屯將所敗遣使謝罪請爲后子有女願婚諸王并求初附時分處豐勝靈夏朔代六州降戶數千帳及粟種冶鐵農器后從姚璹等議與之由是盛強詔淮陽王武延秀聘其女爲妃以知微攝春官尙書與司賓卿楊鸞莊持節護送默啜僞怒以爲后家子我女欲嫁皇家且問唐子孫被殺尙二

人在我世附唐當入立之卽因延秀等妄號知微爲可汗自將
十萬騎南向擊靜難平敵清葵等軍靜難軍使慕容畜則以兵
五千降默啜入圍媯檀后詔武重規沙吒忠義張仁亶閻敬容
李多祚等共率兵四十五萬以討之默啜破蔚州飛狐進殘定
州殺刺史孫彥高焚廬舍鄉聚后怒詔更其號曰斬啜有能斬
者王之復圍趙州長史唐波若應之殺刺史高淑入攻相州移
忠義河北道前軍總管多祚後軍總管將軍嵎莸公福富順爲
奇兵總管中宗以皇太子拜行軍大元帥納言狄仁傑副之右
丞宋玄爽爲長史中丞霍獻可爲司馬吉頊爲監軍扶餘文宣
等六人分任總管默啜聞之悉坑所掠趙定男女八九萬出五
回道去所過剽人畜金幣子女殆盡諸將皆顧望不敢戰獨仁
傑以兵追之默啜恃勝有驕志諸蕃悉往聽命復立咄悉訶爲

左察骨咄祿子默矩爲右察各統兵二萬子旬俱爲小可汗位
兩察上典處木昆等十姓兵四萬號拓西可汗歲入寇鈔戍兵
不得休后選魏元忠爲天兵軍大總管婁師德副之按屯以待
默啜復剽隴右牧馬鴉匹以去又詔相王爲天兵道大元帥率
并州長史武攸宜夏州都督薛訥與元忠擊之兵未出引去明
年寇鹽夏掠羊馬復攻石嶺圍并州以雍州長史薛季昶爲持
節山東禦防大使節度滄瀛幽易恒定嬌檀平等九州之軍張
仁亶統清彘障塞及諸州兵與相犄角默啜入代忻殺畧長安
三年遣使者莫賀達干進女于皇太子之子后使平恩郡王重
俊義興郡王重明盛服立諸朝更遣大將移力貪汗獻馬千匹
謝許婚渥禮其使中宗復位入攻鳴沙忠義與戰不勝死幾
萬人遂入原會多取牧馬詔復絕婚更賞購爲諸衛大將軍以

輕之默啜復殺行人鴻臚卿臧思言詔遣朔方道大總管張仁
亶屯邊塞三受降城以絕寇路睿宗立又請和親取宋王成器
女爲金山公主下嫁會奚執左羽林大將軍孫佺等獻諸默啜
爲所殺玄宗怒更以郭元振代唐休璟屯戍復絕和親遣其子
楊我支特勒入宿衛固求婚妻以蜀王女南河縣主下書諭慰
明年使子移涅可汗引同俄特勒火拔頡利發石失畢精騎攻
北庭都護郭虔瓘斬同俄乃奔鮮火拔不敢歸攜妻子來奔
拜左武衛大將軍封燕山郡王賜資優繹楊我支死詔宗親三
等以上弔其家時默啜已老愈昏暴管西滅婆葛虐用奚契丹
部落怨畔於是十姓左五咄陸右五弩失畢俟斤皆請降葛邏
祿烏屋鼠尼施三姓隨之大漠都督特進朱斯陰山都督謀落
旬難玄池都督鼎實力烏鼻率衆內附詔處其衆於金山拜薛

訥涼州鎮軍大總管節度赤水建康河源等軍屯涼州都督楊
執一副之郭虔瓘朔州鎮軍大總管節度和戎大武等軍屯并
州長史王駿副之撫新附檢鈔暴所在犄角應援勢始寢削其
壻高麗莫離支高文簡與蹀跌都督思太吐谷渾大將慕容道
奴郁射施大將鶻屈頡斤苾悉頡力高麗大將高拱毅合萬餘
帳相踵款邊詔內之河南拜文簡左衛大將軍遼西郡王思太
特進右衛大將軍兼蹀跌都督樓煩郡公道奴左武衛將軍雲
中郡公鶻屈頡斤左饒衛將軍陰山郡公苾悉頡力左武衛將
軍鴈門郡公拱毅左領軍衛將軍平城郡公各兼刺史賜賚有
差默啜復討九姓衆潰人畜皆死思結等部復來降悉授以官
轉薛訥朔方道行軍大總管太僕卿呂延祚靈州刺史杜賓客
佐之使爲備禦詔金山大漠陰山玄池都督等共圖取默啜後

因謀九姓拔曳固戰獨樂河勝後不爲備歸道大林中其殘衆突出擊斬默啜入蕃使郝靈佺傳其首京師骨咄祿子闕特勒合部攻殺小可汗及默啜用事諸臣并宗族畧盡立其兄默棘連是爲毗伽可汗

默棘連性仁友自以立非已功讓以闕特勒不敢受拜爲左賢王專制其兵久之因突騎施蘇祿自爲可汗部種多貳乃召可敦父職欲谷與謀故爲默啜衛官免死廢歸年七十餘衆尊畏之俄而跌跌思太等自河曲來歸棘連得之欲盜塞欲谷止之曰天子英武人和歲豐未有以間矧我兵新集豈宜輕動棘連又欲築城起佛老廟亦止之曰突厥衆不敵唐百分一皆隨水草射獵居處無常遇勝則進逢敗卽退若變爲城居唐兵攻戰必爲所擒且佛老教人柔弱非疆武術棘連善其策開元八年

冬御史大夫王駿爲朔方大總管奏請西徵拔悉蜜東發奚契
丹兩蕃兵期以明年秋彙集稽落河掩其牙棘連大恐欲谷度
二蕃相距遠勢難連合駿與張嘉貞有隙必相執異亦不能來
卽皆來我當悉衆北徙彼糧竭自去拔悉蜜輕而好利若先至
可擊取之尋果引衆至見兵未集懼而引退連欲擊之又止之
以兵千里遠山士殊死鬪鋒不可當不如躡之距北延二百里
間道襲其城拔悉蜜衆走無所歸悉爲所禽還由赤亭掠涼州
都督楊敬述使副將盧公利判官元澄等勒兵邀擊令軍士裸
臂持滿會天大寒手不能施由是大敗澄脫身走貶敬述白衣
殺賊連遂大振盡有默啜餘衆明年固乞和請父事天子許之
連歲遣使獻方物求婚未許元宗東封泰山張說用裴光廷謀
突厥雖請和難以信結其可汗仁而愛人下爲之用闕特勒善

戰敗欲谷沈雄多智英衛之流三人方協知我舉國東巡有如
乘間何以禦之請卽命使召其大臣入衛乃遣鴻臚卿袁振往
諭連以不得婚爲耻與可敦坐帳中語振曰吐蕃唐與爲婚奚
契丹亦尙主何獨突厥前後請不許振謂可汗乃天子之子故
不許婚連曰二蕃皆賜姓何爲皆可且公主亦非帝女我不敢
有所擇但屢請不得爲諸國笑振許更請乃爲置酒遣大臣阿
史德頡利發入獻庖從封禪見帝射兔馬前一發斃之頓首賀
曰陛下神武超絕人間無有因問饑欲食否對曰仰服威望雖
使十日不食猶爲飽也庖畢宴賜遣之然卒不許和親自是比
年遣大臣入朝吐蕃以誓約與連和鈔邊連不敢從封上其書
帝嘉之引使者俸錄宴紫宸殿詔朔方西受降城許互市歲
賜帛數十萬十九年闕特勒死遣使弔祭刻碑立廟仍圖戰陣

狀如四垣連視之悲哽俄爲梅錄覈所毒怨死殺之滅其種然
後卒帝爲發哀弔祭詔史官李融文其碑國人共立其子爲伊
然可汗立凡八年三遣使入朝卒其弟嗣立則爲登利可汗

登利可汗既立登利者釋言果報也遣使朝正獻方物時年尙
幼母婆旬爲內臣侯斯達干亂乃遂預政諸部不協其叔父分
掌東西兵號左右殺士之精勁者皆屬焉因誘斬西殺奪其兵
左殺判闕特勒懼卽攻殺登利立毗伽可汗次子俄爲骨咄葉
護所殺立其弟旋又殺之葉護乃自爲可汗天寶初其大部回
紇葛邏祿拔悉密並起攻殺葉護尊拔悉密之長爲頡跌伊施
可汗自爲左右葉護遣使來告國人奉判闕子爲烏蘇米施可
汗其子葛臘哆爲西殺帝遣使者諭令內附不聽其下三部共
攻之米施遁亡西葉護阿布思及葛臘哆率五千帳降封哆爲

懷恩王三載拔悉密等殺米施傳首京師獻太廟其弟鶻隴匄
立是爲白眉可汗自是突厥大亂國人推拔悉密酋爲可汗詔
朔方王忠嗣乘亂率兵抵薩河內山擊破左部右尙未下葛邏
祿遂殺拔悉密可汗率回紇骨力裴羅定其國是爲骨咄祿毗
伽闕可汗明年復殺白眉傳首京師婆匄率衆亦歸封爲賓國
夫人歲給粉直二十萬其國始於後魏大統時至是滅後有朝
貢者九姓舊部其地盡入回紇族有分國於西者曰西突厥
附載 西突厥

結射匄

統葉護

莫賀咄

肆葉護

伽那設

咥利失

欲谷設

畢賀咄

乙屈利失

賀魯

彌射

步真都支

元慶

子獻

斛瑟羅

烏質勒

蘇祿

西突厥其先訥都陸之孫吐務號大葉護長子曰土門伊利可

汗次子曰室點蜜國語曰瑟帝米子曰達頭可汗亦曰步迦可汗分有烏孫故地隋煬帝時曷薩那可汗來朝留其弟闕達度設畜牧于會寧郡卽自稱闕可汗武德元年内屬賜號吐烏過拔可汗與李軌連和爲軌所滅江都亂曷薩那從宇文化及至黎陽遁歸長安高祖降榻與坐封歸義郡王後爲北突厥使者所殺國人共立達頭之孫號結射匱可汗旣立拓地東至金山西至海與北突厥爲敵建延龜茲北之三彌山玉門以西諸國多役屬與東突厥抗連年係貢條支巨卵師子草等帝厚申撫結射旣死立其弟是爲統葉護可汗

統葉護勇而有謀攻戰輒勝因并鐵勒下波斯尉賓控弦數十萬徙居石國北之千泉遂霸西域諸國悉授以頡利發而命一吐屯監統以督賦入明年約諸國并力討東突厥頡利大懼相

與約和因請婚于帝與羣臣謀其國去遠緩急不可仗欲勿許
封德彝曰計今之便莫若遠交而近攻請聽許婚待我既定而
後圖之帝乃許詔高平王道立至其國統葉護喜遣真珠統俟
斤與俱還獻萬釘寶鈿金帶并馬五千匹遇頡利阻道遣人語
以若迎唐公主必假我道始且留之由是未克婚方負其強不
以恩結下衆怨多叛去已爲莫賀咄殺之而自立

莫賀咄者統葉護諸父也是爲伯利俟咄可汗其子咄力持勸
亡于康居立後國人不附弩失畢部自推泥孰莫賀設爲可汗
辭不受復迎立咄力爲乙毗鉢羅肆葉護可汗與俟咄分國而
王拏固不解各遣使朝貢貞觀四年俟咄請婚詔以突厥方亂
君臣未定不許由是西域諸國悉叛之國大虛耗雖已所部亦
多引去反以兵擊之俟咄走保金山爲泥孰所殺衆悉附肆護

護奉以爲大可汗

肆葉護已立即北討鐵勒薛延陀復爲所敗爲人性猜愎狹於
統下小可汗乙刺者於國最有功肆葉護聽讒滅之衆皆沮駭
有思泥孰陰圖殺之泥孰亡入焉耆未幾沒耳達干與弩失畢
部諸豪謀廢肆葉護因輕騎走康居以憂死國人迎慕賀設之
子泥孰伽那設立之泥孰伽那設既立武德時來朝奈王與之
盟約爲昆弟卽位遣鴻臚少卿劉善因持節冊爲利鄰咄陸可
汗賜鼓纛段絳巨萬遣使來謝太上皇宴之兩儀殿謂長孫無
忌曰今四方率服古亦有乎無忌上千萬歲壽太上皇喜以酒
屬帝帝頓首謝亦捧觴上壽明年卒弟同俄設立

同俄設既立是爲沙鉢羅咄利失可汗分其國爲左右十部部
統以一人人授一箭號十設左五咄陸部置五大噶唇碎葉東

右五弩失畢部置五大俟斤居碎葉西號十姓部落然不爲衆
悅賴其部統吐屯以兵反襲唃唃利失率左右戰不勝與其弟步
利設奔焉耆國人謀立欲谷設爲大可汗以唃唃利失爲小可汗
會統吐屯被殺欲谷設又爲俟斤所破唃唃利失乃復得故地後
西部卒自立欲谷設爲乙毗咄陸可汗與唃唃利失交戰殺傷不
可計與諸部約分伊犁河以西咄陸主之東唃唃利失主之自是
西突厥又分二國矣咄陸建廷鐵曷山西謂之北廷駁馬結骨
諸國悉臣附之陰與東部吐屯俟列發以兵攻唃唃利失奔于拔
汗那而死國人立其子是爲乙伯利失可汗踰年死弩失畢大
將迎立伽那設之子畢賀咄葉護是爲乙毗沙鉢羅葉護可汗
太宗詔左領軍將軍張大師持節冊命賜鼓纛建廷雖合水北
謂之南廷東薄伊列河隸以龜茲鄯善且末吐火羅焉耆石史

何穆康等國時咄陸兵密盛與葉護數交戰帝遣使敕以敦睦
令各罷兵咄陸不肯聽遣石國吐屯攻殺葉護并其國弩失畢
不服叛去咄陸又擊取吐火羅入寇伊州安西都護郭孝恪引
輕騎三千自烏骨徂擊敗之咄陸以處月處蜜兵圍天山不克
孝恪追北拔處月俟斤城抵遏索山斬千餘殺降處蜜部而歸
咄陸性狠傲留使者元孝友等不遣妄曰我聞唐天子才武視
我討康居與相等否又襲破道米國係累其人取貲口不以與
下其將泥孰啜怒奪取之擒斬以徇麾下胡祿屋復舉兵襲咄
陸國遂大亂率衆度葉水保可敦城因自出招叛亡爲阿悉吉
闕俟斤所敗乃襲取白水胡城以居弩失畢遣使詣闕請所立
帝遣通事舍人溫無隱持詔與其大臣擇授子孫賢者立乙毗
之子乙屈利失是爲乙毗射匱可汗立後悉還使者遣使貢方

物且請婚帝令割龜茲子闐疏勒朱俱波惹嶺五國爲聘禮不
克婚弩失畢將兵攻白水胡城咄陸勒兵薄聞大勝因招徠舊
部皆不從咄陸自知衆怨乃走吐火羅及賀魯反射匱部落盡
爲所併

賀魯者室點蜜可汗五世孫曳步利設特勒劫越之子始代阿
史那步真爲葉護居多邏斯州直西州北千三百里統處月處
蜜姑蘇歌邏祿弩失畢五姓之衆貞觀二十三年悉其部落內
屬帝優撫之會討龜茲請先馳爲鄉導詔授昆丘道行軍總管
宴嘉壽殿解御衣厚賜予之擢累左驍衛將軍瑤池都督處其
部於廷州密招攜散處蕃益衆謀取西廷二州高宗遣通事舍
人喬寶明馳撫永徽二年遣子匿遲入衛拜右驍衛中郎將後
遣還勸其父引而西取咄陸故地建牙於千泉自號沙鉢羅可

汗統咄陸弩失畢十姓部落婿卽胡祿吸闕與阿悉結闕俟斤
兵最强盛至數十萬以咥運爲莫賀咄葉護數擾西蕃入寇延
州敗數縣殺掠數千人詔大將軍梁建方契苾何力將軍高德
逸薩孤吳仁嗣之發府兵三萬合回紇騎五萬擊之四年又遣
程知節率諸將進討是歲咄祿死其子貞珠葉護嗣明年知節
擊歌邏祿處月斬千級收馬萬計副將周智度擊拔處木昆城
斬馘三萬獲馬甚衆顯慶初又詔窮討大將蘇定方分兵出金
山道殺其大將護都搭達官等二百人五咄陸間敗遼南道降
追至多羅斯川會大雪掩其不虞晝夜兼進收所過人畜軍飽
氣張賀魯衆適獵定方兵破其牙侖數萬人護鼓譟器械賀魯
跳度伊麗水蕭嗣業次千泉阿史那彌射至伊麗處月處蜜諸
部皆下次雙河賀魯先以部失達干據柵戰彌射攻潰之定方

追至碎葉水盡奪其衆賀魯至遲將奔鼠犂設至石國馬不能
進衆且饑餓齎寶入蘇咄城市馬城主伊涅達干迎入拘送石
國乃悉散諸部兵開道置驛悉還所掠於民西域平高宗執獻
昭陵赦而不誅裂其地爲州縣處木昆部爲旬延都督府索葛
莫賀部爲噶鹿都督府胡祿屋闕部爲鹽泊都督府攝合提敏
部爲雙河都督府鼠尼施處半部爲鷹婆都督府彌射爲典昔
亡可汗遣崑陵都護府領五咄陸部步真爲繼往絕可汗置濛
池都護府領五弩失畢部各兼驃騎大將軍賜帛千萬遣光祿
卿盧虔持冊命之其所役屬諸國皆置州西盡波斯金隸安西
都護府四年病死詔葬頡利冢旁紀其榮於石

彌射亦室點密五世孫世爲莫賀咄葉護貞觀中賜旗鼓立爲
奚利咄咄陸可汗族兄步真觖望欲謀自立彌射懼卽舉所部

處月處蜜等入朝拜右監門衛大將軍步真遂自立爲咄陸葉
護衆不厭去之亦與族人來朝拜左屯衛大將軍彌射從征高
麗有功封平壤縣伯遷右武衛及是皆爲可汗得補所部刺史
以下彌射初擊貞珠葉護於雙河斬之殺二關噉拜流沙道安
撫大使以俱無綏御材其下多怨思結都曼因率疏勒朱俱波
喝槃陀三國叛亦命蘇定方討降之都曼保馬頭川龍朔二年
命以兵從颶海道總管蘇海政討龜茲步真尙懷舊怨欲并彌
射誣以謀反海政不能察與軍吏謀稱詔旨有所齎賜彌射以
麾下至悉收斬之獨其部鼠尼施拔塞幹走海政追平之乾封
中步真死咸亨二年以部長阿史那都支爲左驍衛大將軍兼
匄延都督以安輯其衆儀鳳中都支自號十姓可汗與吐蕃連
和寇安西詔裴行儉討之疏請毋發兵可以計取調露元年詐

爲冊送波斯國王子道西蕃并安撫大食都支果不疑率子弟
上謁遜禽之併執諸部渠長降別帥李遮旬以歸西姓白是益
衰其後二部人口離散遂擢彌射子元慶步真干涉利散斛瑟
羅爲左右玉鈴衛將軍襲父可汗號及領所部元慶累拜鎮國
及行左威衛大將軍武后擅命率諸蕃長請賜睿宗姓武氏長
壽中坐謁皇嗣被誣要斬流其子獻于振州四年部人立阿史
那倭子爲可汗與吐蕃寇武威大總管王孝傑與戰冷泉大傾
谷砂之碎葉鎮守使韓思忠又破泥孰俟斤及突厥施賀汗胡
祿等因拔吐蕃泥孰沒斯城聖曆二年以斛瑟羅爲左衛大將
軍兼平西軍大總管更號竭忠事主可汗撫鎮國人懼焉賀勒
兵強不敢歸其部人內遷長安而死擢子懷道爲右武衛將軍
兼潯池都護長安中獻還爲右驍衛大將軍積西節度使襲典

背亡可汗令安撫招慰十姓部落遂斬都擔叛者傳首關下收
碎葉以西帳落三萬內屬璽書嘉慰復因葛邏祿胡屋鼠尼施
三姓內屬爲默啜侵掠以獻爲定遠道大總管與北廷都護湯
嘉惠等持角時突騎施陰幸邊隙獻乞益師玄宗不許詔左武
衛中郎將王惠持節安慰拜突騎施都督冊命方下突騎施已
圍撥換大石城將取四鎮嘉惠卽發三姓葛邏祿兵與獻共擊
之由是部落自相殘滅獻亦以婆葛囉狼不能制歸死畏安西
突厥遂亡

突騎施烏賀勒者西突厥別部嘗爲賀魯所滅可汗皆先入侍
部無的君初隸斛瑟羅爲莫賀達干會其政殘衆不悅烏賀勒
獨能撫下有威信諸部順附帳落寔盛乃置二十都督兵各七
千屯碎葉西北稍攻得碎葉卽徙其牙居之謂碎葉川爲大牙

弓月城伊麗水爲小牙其地隣北突厥西諸蕃東直西廷州盡并斛瑟羅地聖曆二年遣子遮弩來朝武后厚加慰撫神龍中封懷德郡王而卒其子咄鹿州都督婆葛爲右驍衛大將軍襲封爵勝兵二十萬詔阿史那懷道持節冊命賜官人四景龍中遣使入謝中宗爲御前殿引見勞賜餼與其將閼噶忠節交怨加兵忠節以千金賂宗楚客願無入朝請導吐蕃擊婆葛以報時楚客方專國卽以中丞馮嘉賓持節經制婆葛逼得與忠節書遂殺嘉賓使弟遮弩率兵盜塞安西都護郭元振表婆葛狀直詔城兵收死之表索楚客頭以徇大都護郭元振表婆葛狀直詔許赦之西土遂定旣而與遮弩分治其部遮弩恨衆少叛歸默啜請爲鄉導反攻其兄默啜留遮弩自以兵二萬禽婆葛歸而語遮弩曰汝兄弟不相協能盡心事我乎遂兩殺之

突騎施別種車鼻施噉蘇祿者哀拾餘衆自爲可汗部種稍合至三十萬復雄西域開元五年來朝授右武衛大將軍突騎施都督却所獻不受使王惠持節封爲順國公金方道經畧大使賜錦袍鈿帶魚袋七事上以詭猾不純羈係之進號忠順可汗納贄請婚取懷道女號交河公主妻之是歲弼馬安西令使者致公主教於都護杜暹暹怒曰阿史那女敢言教耶咎其使不報蘇祿怒陰結吐蕃舉兵掠西鎮圍安西城代者趙頌貞乘城久之戰敗蘇祿畧人畜發困貯徐聞遁入相乃引去卽遣首領葉支阿布思來朝玄宗召兄贊之東突厥使者與爭長曰突騎施國小且突厥臣不宜居上蘇祿使者曰宴乃爲我不可下遂設東西幄寓蘇祿使者於西乃克宴始蘇祿性儉約愛治其人每戰所得盡以予下故諸族附悅之爲盡力後交通吐蕃突厥

二國皆以女妻與交河。金爲可敦數子。爲葉護費日廣而無素儲。晚年病風。南獲稍留不分。下始攜貳其種人。自分娑葛後。姓爲黃蘇祿部。姓爲黑更相猜讐。而大首領莫賀達干都摩支二部方盛。夜攻殺蘇祿都摩支。立蘇祿子吐火仙骨噉爲可汗。居碎葉城。引黑姓可汗余微特勒保怛邏斯城共擊達干。帝使磧西節度使蓋嘉運和撫達干。率石王莫賀咄吐屯史王斯謹提共擊敗都摩支。護蘇祿子并其弟葉護頓阿波疏勒鎮守。夫蒙靈智復挾銳兵與拔汗那王掩怛邏斯城。斬黑姓可汗與其弟撥斯入曳建城。收三可敦而還。由是諸國皆降。處木昆旬延闕律噉等諸部皆上書願得稽首聖顏。以部落附安西。承爲外臣。許之。開元二十七年。擢闕律噉右驍衛大將軍。冊石王爲順義王。加拜史王特進。顯階其功。俘獻吐火仙骨噉于太廟。赦

爲左金吾衛大將軍脩義王頓阿波右武衛將軍以莫賀達干
統領其衆後三年又立阿史那懷道子昕爲十姓可汗領突騎
施部遣兵護送至但蘭城爲莫賀咄所殺自立爲可汗安西節
度夫蒙靈胥斬之以大蘇官都摩支闕頡斤爲三姓葉護天寶
元年突騎施部更以黑姓伊里底蜜施骨咄祿毗伽爲可汗數
通使貢十二載黑姓部立登里伊羅蜜施爲可汗亦賜詔冊至
德後突騎施衰黃黑姓皆立可汗相攻中原方多故不暇治理
乾元中黑姓可汗阿多裴羅猶能遣使者入朝大曆後葛邏祿
盛徙居碎葉川二姓微至臣役於葛祿斛瑟羅餘部附回鶻及
其破滅有柁特勒居焉耆城稱葉護餘部保金沙嶺衆至二十
萬

弘簡錄卷二百五十

明刑部員外郎仁和弘齋邵經邦學

皇清翰林院侍講學士四世孫遠平校閱

附載 吐蕃一

棄宗弄贊 乞黎板布 器弩悉弄 棄隸縮贊

罕悉籠臘 乞立贊 足之煎 可黎可足

達摩 乞維胡
尚恐熱

吐蕃勃罕野氏其種落部屬俱載通考等書其俗謂強雄曰贊
丈夫曰普故號君長爲贊普其官有大相曰論灌副相曰扈莽
都護曰卑逋亦曰論莽熱熱猶國語曰郎也後有君長曰痕悉
董摩生陀土度陀土生揭利失若揭利生勃弄若勃弄生詎素
若至父論贊素生棄宗弄贊弱冠嗣位雄武多英畧西域爭同

諸蕃金貨伏之貞觀八年始遣使者朝貢帝命行人馮德遐資
詔臨撫還同遣使齎幣求婚帝難之歸無以應妄言天子遇我
厚幾得公主會吐谷渾入朝問我遂不許弄贊怒率衆同共擊
之渾不能亢避走青海盡取其貨畜又攻党項破白蘭羌勒兵
二十萬頓松州境遣使貢金甲言迎公主不至將必深入都督
韓威出覘爲其所敗屬衆大擾皆叛以應詔以侯君集爲行軍
大總管出當彌道執失思力出白蘭道右武衛牛進達出濶水
道劉蘭出洮河道金爲行軍總管率步騎五萬進討先鋒自松
州夜蹙其營斬首千級弄贊大懼殆引去遣使者謝罪固請婚
許之遣大相薛祿東贊獻聘禮黃金五千兩他寶稱是十五年
妻以宗女文成公主詔江夏王道宗持節護送築館河源主之
國弄贊率兵次栢海親迎執婿禮恭甚見我國禮儀服飾華侈

輒懷媿沮歸語所親自我先世未有媿帝女者特築一殿以夸
後世立宮室以居之下令禁國人赭面自襁褓屬襲純綃爲華
風遣諸將子弟咸入國學習詩書讀國中文儒以典章疏會伐
遼還遣東贊表賀陛下自將度遼臨城陷陳指日凱旋雖鵝鴈
飛天無是之速臣謹冶黃金爲鵝鴈以獻其高七尺中實酒三
斛二十二年右衛率府長史三元策使西域爲中天竺所掠發
精兵從討破之獻俘于朝高宗授駙馬都尉封西海郡王致書
宰相凡有不忠者勸兵共討之并獻金琲十五種以薦昭陵進
封實王賜餉蕃渥所請蠶種酒人與礪磴等匠皆許之永徽初
卒帝爲舉哀遣使者弔祠因琢石象其形列陵闕下以寵褒之
子死立其孫乞黎拔布因年幼倚東贊當國日以富强顯慶三
年獻金盎金頗羅復請婚龍朔麟德中與吐谷渾不和遞相表

表朝廷依違會吐渾大臣素和貴來奔。悉以虛實東贊。率銳兵
擊破之。河源王慕容諾曷鉢與弘化公主引殘落走涼州。詔涼
州都督鄭仁泰爲青海道行軍大總管。率將軍獨孤卿雲等屯
涼州。安集大使蘇定方節度諸將以定其亂。使與吐渾平賊東
贊姓婆氏目不識文字而性明毅。用兵有節制。太宗時入朝。占
對合旨。授右衛大將軍。妻以琅邪公主外孫段氏。薛曰。國君尙
未謁主。陪臣敢先矧。先臣有所聘婦乎。太宗雖異其言。必欲懷
之以恩。不聽。至是死。四子欽陵贊婆悉多于勃諭金。當國自後
歲入邊。盡破有諸衆。羈縻十二州。咸亨元年。率子闡取龜茲。撥
換城金。廢安西四鎮。詔將軍薛仁貴郭待封率師十萬伐之。至
大非川。欽陵來拒。王師敗績。遂滅吐谷渾。盡有其地。詔司戎太
常伯同東西臺三品姜恪爲涼州道行軍大總管。出討而卒。遂

班師是歲遣論仲琮來朝帝以少游太學頗知書召見問贊普孰與其祖賢對曰勇果善斷不逮然亦令主能勤以治國下無敢欺帝責以本與吐谷渾甥舅國因素和貴勿若主而任之奪其土地又寇我涼州殘所羈縻何耶仲琮頓首曰臣奉命來獻他非所聞帝魁其答以非用事臣故殺其禮上元二年遣大臣論吐渾彌來請和且求與吐谷渾脩好帝不聽明年寇鄯廓等州殺吏略馬牛萬計詔劉審禮等十二總管兵討之吐蕃進攻疊州破蜜恭丹嶺二縣又攻扶州敗守將選僕射劉仁軌爲洮河鎮守久之無功吐蕃與西突厥連兵攻西安復命中書令李敬元代仁軌帝自臨遣下詔募猛士毋恨籍役痕負益敕益州長史李孝逸備州都督拓王奉發劔南山南壯士先戰龍支敗之擊于青海上審禮戰沒敬元僅免帝見諸將數敗因傳咨近

臣所以禦之之術中書侍郎薛元超慮縱敵生患諫上料兵擊之帝顧黃門侍郎來恒言李勣亡無善將者恒奏向洮河兵足以制敵但諸將不用命耳帝不悟而罷儀鳳四年死子器弩悉弄立器弩悉弄年八歲委政欽陵使大臣來告喪遣往會葬如禮明年贊婆與和貴率兵三萬攻河源屯良非川敬玄與戰復敗黑齒常之引精騎三千夜擣其營始懼引去益嚴烽邏開屯田謀稍折先是茂州西築安戎城以迨敵彊生蕃導取之益併西洱河諸蠻并党項諸衆其地東接涼松茂嶺南極婆邏門西抵四鎮北至突厥幅員萬餘里漢魏荒服從來所無永隆元年文成主薨遣使弔祠始歸我使陳行焉之喪初爲諭欽陵臨以兵欲令拜已不從留之十年贈以睦州刺史武后時來朝賀長壽元年大首領曷蘇率貴州部與党項種三十萬降詔右玉鈐

衛將軍張玄遇爲安撫使帥兵往迎次大度水吐蕃舍曷蘇去別將智插率蕃蠻八千自歸元遇卽其部置葉州用智插爲刺史刻石紀功大度山是歲又詔王孝傑率唐休璟阿史那忠節出擊大破吐蕃復取四鎮從右史崔融議四鎮無兵諸蕃必臨西域以震之南蕃威懾相與連衡河西必危且莫賀延磧袤二千里無水草唐兵不可度則伊西北庭安西諸蕃悉亡乃更置安西都護於龜茲以兵守之勃論與突厥阿史那倭于南侵戰于冷泉孝傑敗走碎葉鎮守韓思忠破泥孰沒斯城證聖元年贊婆又攻臨洮孝傑與戰素羅汗山敗之遣使請和后詔郭元振往道遇欽陵讓以其父曩事朝廷誓好無窮于今擾邊自絕忠與孝安在陵謝以西十姓突厥四鎮或時屬蕃或時屬漢類多翻覆但得聖恩拔去守兵分離屬國各建君長使自爲守旣

不欽漢又匪屬蕃人免憂虞斯爲大幸元振答以十姓四鎮爲
唐編戶已久與吐蕃異陵意使者謂我規削諸部爲唐邊患我
若食土地財賦何不近爭青海湟川而遠較磧漠廣莽萬里之
外哉且唐臣服天下地際海外靡不磨滅而吐蕃獨在者徒以
兄弟小心上下一力得相保耳十姓五咄陸近安西遠于我俟
斤距我纔一磧騎士騰突不易旬至是以爲憂烏海黃河關源
阻輿復多毒癘唐必不能入弱甲屏將易以爲患故我欲得之
非闕諸部也甘涼距磧石道二千里其廣不數百狹纔百里我
若出帳掖玉門使大國春不耕秋不獲不五六年可斷其右今
棄不爲何虞於我哉青海之役黃仁素約和邊守不戒崔知辯
徑俟斤掠我牛羊萬計是以求之遣使者入朝固請元振乞不
許后從之時欽陵專國久兄弟皆才畧沈雄領方面兵贊婆獨

專東境幾三十年衆憚之會悉弄已長欲自得國與大臣論嚴
等圖去之賊方提兵居外託古田獵勒兵執殺親黨二千餘人
遣召欽陵不受命悉弄自將討之賊兵潰自殺左右百餘人皆
從死贊婆與兄子莽布支等部族炊寒詔遣羽林飛騎迎勞厚
禮慰之擢爲特進輔國大將軍封歸德郡王莽布支左羽林大
將軍安國公皆賜鐵券贊婆卽領部兵戍河源未幾死贈安西
大都護久視元年又攻涼州休璟擊敗之使論彌薩來朝請和
后宴之麟德殿奏百戲音樂長安三年又遣使獻馬并黃金求
婚會審南屬國泥婆羅門等叛自將討之卒于軍諸子爭襲而
國人立棄隸踰贊時方七歲使者求告中宗爲舉哀輟朝且求
盟未報會監察御史李知古建討姚州蠻削吐蕃鄉導詔募劍
南士擊之蠻反以情輸之殺知古尸以祭天進攻蜀漢詔鑿武

監軍右臺御史唐九徵爲姚弋瑤討擊使率兵往吐蕃以鐵紐
梁漾嶺二水通西洱蠻築城戍之徵毀紐平城建鐵柱於滇池
以勒功景龍三年更遣使納貢祖母可敦又遣宗俄請婚以雍
王守禮女爲金城公主下嫁遣尙贊咄名悉臘等來迎鑿悉結
羅嶺以通車行帝念主幼別賜錦綉與雜伎諸工悉從給輿茲
樂詔左衛大將軍楊矩持節送之拜爲鄯州都督帝幸始平帳
宴羣臣及使者改爲金城縣鳳池鄉愴別里赦其縣罪死賜民
徭賦一年公主至亦築城自居因厚餉矩表請河西九曲爲公
主湯沐其地水甘草良宜畜牧近與唐接朝廷許之自是吐蕃
益張易于入寇開元二年其相全德廷上書乞載盟文定境於
河源丐左散騎常侍解琬蒞盟帝令姚崇等報書命琬持神龍
誓往亦遣尙欽藏獻載辭尙未定趁廷將兵十萬寇臨洮矩恐

自殺詔薛訥王駿等并力戰于武階并長子吐蕃大敗和枕痛
死洮水爲之不流侃若水臨按軍實戰功會豐安軍使王凝濱
先鋒力戰死之仍令弔祭兼瘞露齒詔言吐蕃舊以河爲境近
因主故橋河築城置獨山九曲二軍今既負約其毀橋復守河
如約遣左衛郎將尉遲瓌慰安公主自是寇無寧歲初命郭知
運王君奭相繼鎮河西隴右以扞之吐蕃恃其盛強遣宗俄入
朝請和求與內國敵語涉悖傲詔不內公主上書求聽脩好復
遣論乞力等前後七輩來言孝和皇帝賜盟之時唐相豆盧欽
望觀元忠李嶠紀處訥等二十二人及吐蕃君臣同誓今帝已
崩前臣皆歿近相不及前約必須再盟且甥國被張元表李知
古將兵侵暴故違誓而戰願舅皇許貸前惡歸而大和往者疆
場自白水皆爲閑壤昨因郭將軍屯兵故亦城之假令通和以

爲迎送有如不通因以守境舊與突厥什咄祿善卽口舅甥如
初不與交矣因奉寶瓶牒以獻帝謂自和親有成言欲尋前盟
則可不許復誓禮其使遣還且厚賜贊普自是歲朝貢不犯邊
十年小勃律國王來朝以父事帝還國置綏遠軍以爲扞禦故
吐蕃歲來戰每口我非利若國假道以攻四鎮爾其王沒謹忙
詒書北庭節度張孝嵩謂勃律唐西門失之則西方諸國墮矣
孝嵩遣疏勒副使張思禮以步騎四千馳與夾擊吐蕃死者數
萬遂復九城故地十四年悉諾邏兵入大斗谷攻甘州火鄉聚
君奭勒兵邀其鋒會大雪踰積石軍赴西道以歸君奭豫遣謀
出塞盡燒野草蕃馬無所食倒死過半又率秦州都督張景順
約齊窮蹙出青海乘冰合而度吐蕃已踰大非山縱兵俘掠而
旋中書令張說密奏甘涼河部之人調發頗困願聽其和帝方

龍若與不聽是冬悉諾邏恭祿燭龍莽布文來告入陷瓜州攻
玉門回寇安西副都護趙貞擊却之鄯州都督張志亮又戰
青海西破大莫門城焚燬它橋斬級五千吐蕃慟哭而走又明
年瓜州都督張守珪率伊沙等州兵破吐蕃大同軍信安王禕
出隴西拔石堡城置振武軍獻俘於廟詔將軍裴旻敢有掩戰
功不及賞者許士自陳其或逗留舉隊悉如軍法能禽其王者
授大將軍士氣益奮論莽熱論泣熱以贊普命令曩骨委普塞
下曩骨即千牛官謝都督刺史二國有舅甥好昨彌不弄羌党項交構
故失權聽都督遣腹心吏與曩骨還議盟事時忠王友皇甫惟
明益言約和便帝怒其向書悖慢必欲滅之惟明曰昔贊普幼
是必邊將好功之人爲之以激怒上使二國交惡與師隱盜財
利詐功希賞今河西隴右貲耗力窮陛下幸詔公主許其約和

以紓邊患民策之上也帝采其言枚惟明及中人張元方以書賜公主及見言天子意贊普大喜厚禮饋待使御史名悉臘奉表及獻奇寶言甥爲先帝舅頗親特爲邊將恐亂如蒙澄亮千萬歲不敢負盟十八年至京帝御前殿列羽林仗內之悉臘畧通文字宴語加禮賜紫服金魚輒受服辭魚曰國無是不敢當帝遣御史大夫崔琳報聘又請於赤嶺交馬甘松嶺互市宰相裴光庭以甘松爲國險阻聽以赤嶺爲界豎大碑刻約其上敕祕書寫賜五經二十一年再遣工部尙書李昂賜物萬計隨遣使謝恐邊吏妄意請加曉諭詔守珪與將軍李行祿同布支分諭劍南河西州縣二國和好自今無相侵暴還使悉諾勃海納貢并徧遺執政幣器明年又獻寶器數百具形制殊詭詔置提象門示羣臣其後西擊勃律遣使告悉諭令罷兵不奉詔卒殘

其國時河西節度使崔希逸鎮涼州語成將乞力徐邀許各罷
守兵共刑白犬爲盟明年僉史孫誨入奏妄言無備可取帝惑
之詔內豎趙惠琮共往按狀欲希功倖賞矯發州兵襲破吐蕃
青海上斬獲不貲力徐遁走復大悲恨不朝二十六年大入河
西希逸拒破之召拜河南尹鄯州都督杜希望又拔新城更號
咸戎軍擢爲隴右節度使希逸自顧失信悒悒恨恨與惠琮俱
見犬祟而死海亦坐事誅乃命代者蕭昊及希望與劔南節度
王昱分道經畧碎赤嶺碑其年希望發鄯州兵奪吐蕃河橋金
河築鹽泉城號鎮西軍破蕃兵三萬昱以劔南兵入攻安戎城
築左右二小壘兵次蓬婆嶺巡糧守之吐蕃悉銳來救昱大敗
小壘皆沒士死凡數萬論罪貶死高要明年吐蕃攻白草安人
軍詔臨洮朔方分兵救援爲吐蕃所絕白水軍使高東于拒守

吐蕃引去吳遣將追尾大破之朝議以張宥代昱節度章仇兼
瓊爲益州司馬宥文吏不知兵委事兼瓊囚入奏盛陳攻取安
戎之策上悅其議拔瓊代宥謀誘吐蕃安戎城主爲應導官軍
入盡殺吐蕃戍守以監察御史許遠吐蕃復引衆來問安戎絕
水泉會石裂泉湧驚而引去復攻維州不得志詔改安戎爲平
戎城二十九年公主臺上爲發哀遣使來朝因請和不許悉衆
四十萬攻承風堡抵河源軍西入長寧橋到安仁軍渾崖烽騎
將藏希液以銳兵五千破之又襲廓州敗一縣屠吏人攻振武
軍石堡城蓋嘉運不能守天寶元年惟明節度隴右與戰青海
破莽布支斬首三萬級獻俘京師明年破洪濟城攻石堡不克
副將諸葛訓死之代以哥舒翰攻拔其城更號神武軍擒其相
兀論樣郭十載又與南蠻閣維鳳聯兵攻瀘南劔南節度楊國

忠罔上自言破蠻衆六萬於雲南坂故洪州等三城獻俘口十
二載翰復破洪濟大莫門諸城收九曲故地列郡縣因置神策
軍於臨洮西洮河郡於積石西及宛秀軍以實河曲後二年其
強部蘇毗子悉諾邏來降封懷義王賜姓李氏是歲贊普死其
子寧悉籠臘贊嗣遣使者脩好詔京兆少尹崔光遠特節冊弔
還口安祿山亂徵翰兵守潼關諸將亦各赴難邊候空虛遂乘
隙暴掠至德初取樹州及威武諸城入屯石堡明年遣使脩好
請同討賊肅宗遣給事中南巨川報聘頻歲內侵取廓羅岷等
州及河源莫門軍使者數來請和帝雖審其誦姑務紓患詔宰
相蕭華裴迎慶等與盟寶應元年陷臨洮取秦成渭等州明年
遣散騎常侍李之芳左庶子崔倫往聘留之不遣又破西山合
水城入大震關取蘭河鄯洮等州盡獲隴右地廣德元年進圍

涇州破邠州入奉天郭子儀禦之與吐渾党項兵二十萬東畧武功渭北行營將呂日將戰盤屋西破之又戰終南代宗幸陝子儀退趨商州遂入長安立廣武王承宏爲帝改元僞赦署置官吏衣冠盡逃山谷或奔竄外方亂兵鈔掠道路梗閉光祿卿殷仲卿率千人壁藍田選二百騎度澧水給以郭令公且來吐蕃驚夜引去留凡十五日退圍鳳翔節度使孫志直拒守鎮西節度馬璘以千騎戰郤之尙屯原會成渭間不動又南入松維保等州及雲山新籠城明年始遣還之芳等會僕固懷恩反合吐蕃吐渾兵攻邠州入營奉天西郭晞以銳士夜搗其營斬首數千級奪馬五百取四將始引去嚴武又拔鹽州戰西山取其衆八萬圍涼州數年河西節度楊志烈因授絕跳保甘州城遂亡永泰元年請和詔與宰相元載杜鴻漸同盟方罷懷恩復誘

之大將尙結恩贊摩尙息東贊等衆二十萬至醴泉邠將白孝德不能抗京師戒嚴詔追還子儀諸將分守要害先所遣朔方兵馬使渾日進孫守亮屯奉天吐蕃逼之日進單騎而馳勇士二百踵進左右擊射皆應弦而仆因大驚辟易日進挾其一將躍出舉軍望而譟及還無一矢著身明日海城又發機石勁弩故兵多死凡三日乃斂軍回營日進探知曲折卽夜斫營斬千餘級生擒五百人又戰馬嵬凡七日破蕃萬人斬首五千獲馬橐幟械甚衆露布以聞議者以爲天助吐蕃復發游騎掠武功爲馬璘健士所殲我氣益奮乃徙營九變山北掠醴泉居人數萬再與回紇合還攻奉天抵馬嵬子儀說回紇擊之大敗引還失駝馬牛羊甚衆大曆元年命大理少卿兼中丞楊濟脩好隨以首領論泣藏等入謝兼朝貢復遣戸部尙書薛景仙往報二

年又寇靈州掠宜祿景仙與論泣陵借來請以鳳林關爲界俄
又遣使路悉等十五人來朝三年尙悉結功高請老贊摩代爲
東面節度使專河隴尙悉摩復來朝九年帝遣諫議大夫吳損
脩好吐蕃使亦入朝時子儀屯邠州李抱玉屯高壁馬璘屯原
州李忠臣屯涇州李忠誠屯鳳翔臧希讓屯渭北以備其入明
年復攻臨涇隴州次普潤焚掠人畜輿抱玉戰義寧破之道涇
州璘尾追敗之於百里十一年劔南節度崔寧大破故洪等四
節度氏蠻党項等兵斬首萬級禽首領千人牛羊廩鎧甚衆吐
蕃不得志入掠黎雅復合南詔與戰破之禽大籠官論器然又
侵坊州取党項牧馬寧攻破望漢城山南西道節度張獻恭戰
岷州吐蕃走寧破西山三路及邛南兵斬首八千級十三年蕃
相馬重英引四萬騎寇靈州塞漢御史尙書三渠以擾屯田爲

朔方留後常謙光所逐重英殘鹽慶而去鳩南詔二十萬衆復
攻茂州畧扶文侵灌口詔發幽州兵馳拒蕃大奔破初吐蕃使
數至留不遣所俘口悉部送江南德宗卽位欲緩懷以德遣太
常少卿韋倫持節歸俘五百厚給衣物敕邊吏護卒障無侵擾
蕃人感畏是時乞立贊嗣位爲贊普矣乞立贊姓戶盧提氏及
卽位故爲恭謹語倫有三恨一不知天子喪不往弔二山陵不
及賻三不知舅卽位反發兵三路連衡卽發使者隨倫入朝帝
又遣倫還其蜀俘吐蕃見倫再至歡甚授館作樂留九日以諭
欽明思等五十人從獻方物明年崔漢衡又往遣入蕃判官常
魯與諭悉諾羅入朝道贊普語曰我與唐舅甥國詔書乃用臣
禮耳我因引景龍詔書唐使至甥先與盟蕃使至舅亦將親盟
其禮奉均帝以前宰相楊炎不通故事爲解許之收獻爲進賜

爲寄領取爲領之并約地界雲州西盡賀蘭山爲吐蕃境其大相尙悉結忍而好殺耻劒南之敗未報不助和議次相尙結贊有謀固請休息邊人乃用結贊爲大相遣使區頰贊與漢衡偕來約盟清水計會使樊澤初約以牛馬爲牲隴右節度張鎰欲求其禮請用犬豕羊結贊聽諾將盟除地爲壇二國各引二千士列遠外鎰與漢衡幕府齊映齊抗計會使于頔及澤魯皆朝服結贊與論悉頰藏論臧熱論利陀論力徐等對升壇刑牲壇北雜其血以進約唐地涇州左盡彈箏峽隴州右極清水鳳州西盡同谷劒南南盡西山大度水吐蕃守鎮蘭渭原會西臨洮東成州抵劒南西磨些諸蠻南盡大河北自親泉軍抵大磧其賀蘭棗它嶺間爲間田二國所棄地毋增戍兵毋創城堡毋耕邊田帝復於京城右郊命尙書宰相與吐蕃使者盟禮如清水

前二月告廟齋三日關播跪讀敕書已乃大享厚賜遣之助討
朱泚結贊莽羅領兵炊邊詔右散騎常侍于頔持節慰撫計會
頔通太常少卿沈房爲安西北廷宜慰使以報之初約得長安
昇涇靈四州會大疫引去及泚平責求前地朝議其勢薄第賜
詔書償帛萬匹遂以爲怨貞元二年詔倉部郎中趙聿往使適
吐蕃犯涇邠掠人畜敗田稼游騎至好時詔金吾將軍張獻甫
神策將李昇曇等屯咸陽遣左監門將軍康成往使尙結贊屯
上砦原亦遣使諭乞陀來請盟又攻鹽夏刺史杜彥光拓拔乾
曜不能守悉其衆南奔入據之皆戍以兵而自屯鳴沙然饋餉
數因士馬皆饑詔以邊人殘沒避殿自咎命駱元光韓游瓌屯
濱塞馬燧次石州跨河相犄角結贊等懼而請盟詔不許匿情
厚賂令貴將諭頗熱乞和於燧三年命左庶子崔滌李錡至鳴

沙傳詔讓結贊給對一以武亭功未償二因碑什疆場不明故
行境上不能致委曲我日望大臣卒無至者故特引懲邇守將
懼吾衆以城丐我非我敢攻若復許盟當以鹽夏還唐越清水
盟因大臣少故約易壤請悉遣宰相元帥同會許之結贊僞辭
清水非吉地請會原州之士黎樹帝與宰相議上璫檄林蒼巖
阻兵易詭伏不如平涼夸漫坦直且近涇州緩急可依議已定
均約引兵三千列壇外散卒四百至壇下各遣遊將相覘伺結
贊預引精騎三萬伏壇西縱邏騎出入城軍將梁奉厚率六十
騎纔至壇所執之城初不知方就幄更衣吐蕃營三鼓鼓衆譟
而與城通得免漢衡與判官鄭叔矩路泌掌書記袁同直列將
扶餘準馬寧孟日華李至言樂演明范澄王良戴鵬弁中人劉
延邕俱文珍李朝清等及軍士千餘皆被執死者五百城裨將

辛榮矢盡力屈而降結贊至故原州坐見漢衡等慢言渾瑊許
裂地與我而自食其言吾作金枷必欲得瑊以見贊普乃今失
之徒致公等無益當遣文珍馬寧馬弇歸報而囚漢衡叔矩河
州榮廓州準鄯州帝猶使中人齎詔賜結贊不受其戍鹽夏城
者疾疫大興皆思歸迎以犒三千火廬舍頽邪堞而去希全分
兵保之帝哀漢衡等陷辱下詔賜其子七品官叔矩泌弇澄榮
日華至言良賁演明一子八品官同直而下一子九品官以決
勝軍使唐良臣屯潘原神策將蘇太平屯隴州結贊屯石門以
五百騎送漢衡日華延邕等還同使者奉表詔不內吐蕃與羌
渾三分其兵一趨隴州一趨汧陽一趨鈞竿原連營數十里中
軍距鳳翔一舍詭漢服號邢君牙兵入吳山寶雞焚聚落畧畜
牧丁壯殺老孺悉焚李晟所歷大木塞安化監者詔神策將石

李章壁武功良臣移百里城因剽汧陽男女萬人以昇羗渾將
出塞皆慟哭投死塹谷以千數又入豐義圍華亭絕汲道守將
王仙鶴請救於隴州刺史蘇清沔合太平兵赴之爲吐蕃所逆
不勝引還吐蕃日千騎四掠隴兵不敢出復積薪將焚華亭仙
鶴以衆降清沔潛兵大象龕夜半約城中舉火燭天吐蕃衆驚
襲其營去更攻連雲堡飛石投市井皆滿爲虛梁絕塹而升守
將張明遠降吐蕃分捕山間亡人牛羊萬計由是涇隴邠之民
蕩然盡矣連雲堡乃涇之要地三垂峭絕北据高阜凡吐蕃進
退烽火易過及是失之西門城下卽爲敵境每藝稼必陳兵于
野故多失時是歲三州不宿麥吐蕃數千騎又犯長武城城使
韓全義拒以陳許兵無功韓游瓌兵不出諸屯皆閉乃安行邠
涇間治故原州保之帝取所獲生口二百徇諸市以安京師其

初尙畏春夏疾疫每盛秋敢入旣多得唐俘隲之以八四年五月畧涇邠寧慶邠五州之鄙焚吏舍民間係執數萬尙悉董星論莽羅等又寇邠州張獻甫拒斬纔百級轉剽邠坊而去久之沙陀別部叛因復陷北庭都護府安西道絕八年寇靈州發河東振武兵合神策軍擊之甫引還又寇涇州守捉使唐朝臣戰不利大將王進川死之詔涇原劔南山南深入窮討令分其兵毋專向東方九年復城鹽州合渾瑊杜希全邢君牙張獻甫王栖曜范希朝并夏綏銀韓渾兵三萬陳城下以左神策將軍胡堅右神策張昌爲鹽州行營節度使板築之凡役六千人閱二旬訖功吐蕃兵不出戍以兼御史大夫紇干遂與兼中丞杜彥光十二年尙結贊死明年贊普死子足之煎立

足之煎旣立遣使脩好朝廷以其無信不受吐蕃於劔南山馬

馬嶺三路開道進寇臺登韋臯遣潯州刺史曹高任擊卻之生

擒龍官七人斬級三百獲馬糧品械數千戰于鹽州破之于烏

蘭橋頓兵州西九十里橫槽鋒七人疾趨至帳前中一人年少

身長六尺餘自稱徐舍人乃敬業孫兵敗來奔今已三世雖令

握兵未嘗忘歸顧不能自拔耳陰語俘者乘夜使逸臯又出西

山與戰破之十九年龍武大將軍薛仁使于吐蕃二十年贊普

死而其弟嗣立

史失其名

順宗遣金吾將軍田景度持節告哀永貞

元年十月諭乞纓勒藏來貢并助崇陵金帛牛馬十一月衛尉

少卿并中丞侯幼平充冊立使憲宗初遣使脩好且還其俘并

告順宗喪自是比年來朝尋以五萬騎入振武拂鵲泉萬騎至

豐州大石谷鈔回鶻還國者五年命祠部郎中徐復往使并賜

浮屠豫國事者鉢犁述書復至鄯州擅還坐貶其副李逢致命

贊普遣論思邪熱入謝願歸秦原安樂州且歸鄯叔矩路泌之
樞宰相杜佑等議與使者同往報之朝貢歲復不絕因款隴州
塞求互市詔可十二年卒可黎可足立

可黎可足立遣右衛將軍烏重珣弔祭因與扶餘牟李驤偕歸

牟取明人本朔方濟將
驤脫西人貞元初戰沒詔授牟澄王府司馬驤嘉王友明年使

論矩立藏來朝未出境寇宥州靈州兵敗之斬首二千級夏州

節度田緡破其衆三千劔南王播又攻拔峨和栖雞等城詔留

其使不遣十四年始歸之其節度論三摩及宰相尙塔藏復總

兵十五萬圍鹽州爲飛梯鵝車攻城刺史李文悅拒之晝出戰

夜襲其營破吐蕃萬人城壞輒補積三旬不能拔始解圍去中

書令尙綺心兒攻沙州刺史周鼎爲唐固守請救回鶻踰年不

至議焚城郭引衆東奔其都知兵馬使閻朝不從比晨入謁射

親吏周沙奴死執鼎益殺之自領州事城守者八年又二歲糧
械皆竭始降代以綺心兒後疑朝謀變毒死之州人皆易服臣
吐蕃每歲時祀父祖衣上國之服號慟而藏之穆宗卽位遣祕
書少監田洎往告蕃使來平祭者欲會盟長武洎漫應之吐蕃
乃引兵入屯靈武進逼涇州綿亘五十里顯官洎許我盟故來
詔貶洎郴州司戶參軍拜太府少卿邵同爲持節和好使郝玘
與戰多殺其衆邠寧李光顏又至乃引去詔凡方鎮接境者皆
謹備之長慶元年遣使者尙綺力陀思來朝且乞盟詔許之執
政崔植杜元穎王播欲重其事將告于所從禮官議肅代故事
皆不告惟建中時始告廟至會平涼亦不復告而止乃命大理
卿劉元鼎充盟會使副以右司郎中劉師老及右僕射韓皋中
丞牛僧孺尙書吏部李絳兵部蕭俛戶部楊於陵禮部韋綬卿

太常趙宗儒司農裴武京兆尹柳公綽金吾將軍郭鏐與使者
論訥羅咸載名干策同盟京師西郊約二國無相寇讐不得侵
擾境上方盟時蕃騎潛屯魯州靈州節度李進誠與戰大石山
破之二年遣使者趙國章來致信幣命元鼎就盟其國踰成紀
武川抵河廣武梁皆隴右故地曩時城郭未隳蘭州杭柁桃榆
柳岑蔚戶皆唐人見使者麾蓋夾道來觀至龍支城老者千人
泣拜問上安否密詢之故豐州人過石堡城崖壁峭立磴道回
屈號鐵刀城右行數十里土石皆赤所謂赤嶺距長安三十里
渡關恒盧州直趨娑川之南百里減河所流其西南地平原野
秀沃夾河多檉柳山多柘坡皆丘墓貴人有戰功者旁作屋顏
塗之繪白虎以旌勇殉死者瘞其旁至糜谷就館賃普牙在減
河北川周以槍纍率十步植百長槩中制大幟爲三門相距皆

百步甲士持門巫祝烏冠虎帶擊鼓出入必搜索中有高臺環以寶栴贊普坐帳中以黃金飾蛟螭虎豹身被素褐結朝霞冒首佩金鑲劍鉢製通立于右宰相列臺下大享唐使者於牙右禮與國制畧等樂奏秦王破陣及涼州雜曲百伎皆內國人給事中論悉答熟來議盟壇廣十步高二尺使者與吐蕃大臣十餘對位蕃長百餘坐壇下上設巨榻鉢單通升告盟一人自旁譯授于下已歃血鉢單通不歃盟畢重以浮屠爲誓引鬱金水以飲與使者交慶乃降元帥尙塔藏館客大夏川集東方節度諸將百餘置盟策臺上徧曉之戒云各保境土毋相暴犯策署契丹七年塔藏語元鼎曰回鶻小國非我所敵向嘗討之距城三日到卽破滅會國有喪引還唐何所畏而厚之答曰回鶻有功且如約未始妄發兵取尺寸地是以厚之塔藏默然遣諭悉

諸息等同元鼎入謝還踰湟水至龍泉谷西北望殺狐川哥舒翰故壁尙在湟水山蒙谷抵龍泉與河合河之上流由洪濟梁西南行二千里水益狹春可涉秋夏乃勝舟其南三百里三山中高而四下曰紫山直大羊同國古稱崑崙者也河源所出經閼摩黎山東距長安五十里其流澁緩稍合衆流色赤黃益遠他水并注則濁故世謂西蕃地曰河湟河源東北直莫賀延磧尾殆五百里磧廣五十里北白沙州西南入吐谷渾寔狹故號磧尾隱測其地蓋劔南之西其所經見大畧如此上遣左衛大將軍令狐通太僕少卿杜載蒼之是歲尙綺心兒以兵擊回鶻党項小相尙設塔率衆三萬牧馬木蘭梁比歲使者獻金盃銀冶犀鹿羣牛寶曆至太和再造使來朝五年維州守將悉怛謀翠城以降西川李德裕受之收符節仗鉞更遣將虞藏儉掘之

州南抵江陽岷山西北望隴山一面阻崖三面沮江號無憂城
爲西南要扞牛僧孺議不合復歸其城誅夷慘毒以怖諸蕃自
此比五年吐蕃使來必報所貢有玉帶金皿縷褐羣牛尾霞毼
馬羊橐駝立幾三十年病不事委任大臣故不能抗中國邊候
晏然旣死弟達摩嗣嗜酒好畋獵喜內且凶愎少恩政益亂開
成四年命詹事李絳儒往使隨遣輪集熟來朝獻玉罽羊馬是
後國中地震裂水泉湧岷山崩洮水逆流三日鼠食稼人饑疫
死者相枕藉鄯廓間夜聞鼙鼓聲人相驚會昌二年死論贊熱
來告哀遣將作監李璟弔祠無子以妃絳兄尙延力子乞離胡
爲嗣始三歲與妃共治其國大相結都那心不服言贊普支屬
尙多何至立絳氏子見之不拜哭而出川事者共殺之別將尙
恐熱爲落門川討擊使姓末名農力譎詭善幻約三部得萬騎

擊鄯州節度使尙婢婢略地至渭州與宰相尙與思羅戰薄寒
山思羅敗走合蘇毗吐渾牟同兵入萬保洮河恐熱語蘇毗等
宰相兄弟殺贊普天神使我舉義兵誅不道爾歸何得助逆衆
疑而不戰恐熱麾輕騎步河皆降乃禽思羅殺之自爲宰相率
兵二十萬擊婢婢鼓犂牛馬橐駝聯十餘里至鎮西軍大風雷
電部將震死十餘馬畜數百恐熱惡之按軍不進婢婢姓沒盧
名贊心牙牟同國人世爲吐蕃貴相寬厚略通書記不喜仕離
胡疆官之厚幣詒書約歡恐熱大喜退營大夏川婢婢遣將麗
結心莽羅薛呂擊恐熱於河州之南嶺山伏兵射書罵恐熱怒
盛兵出關結心僞北追至數十里薛呂伏兵聚擊會大雨河溢
溺死甚衆恐熱單騎而遁部將岌藏豐贊皆降婢婢厚遇之明
年恐熱復攻鄯州婢婢分兵五道拒守恐熱保東谷山堅壁不

出岷藏線以重欄斷汲道旬日恐熱走薄寒山募散卒數千復戰鵠雞山與南谷皆大敗大中三年將謀渡河婢婢屯兵河源急擊之爲所敗統兵扼橋亦不勝焚橋而還恐熱間出雞頂嶺關憑硤爲梁至白土嶺敗婢婢將尙鐸羅楊藏進戰犛牛硤別將燭盧鞏力欲負硤自固以困恐熱大將磨離髯子不從及戰遂死婢婢糧盡以拓拔懷光居守引衆趨甘州西境恐熱大略鄯廓瓜肅伊西等州所過捕戮積尸狼藉麾下內怨皆欲圖之乃揚聲請唐兵五十萬共定其亂進保渭州求冊爲贊普奉表歸唐宣宗詔太僕卿陸耽持節慰勞命涇原靈武鳳翔邠寧振武等兵迎接恐熱旣至詔左丞李景讓就問所欲恐熱夸倨自大求河渭節度使帝不許復趨落門川收散卒將寇邊會久雨糧絕還奔廓州節度使鳳翔李玘與蕃兵戰隴州斬首五百級

復清水收秦州涇原康季榮復原州取石門等六關靈武李欽
取安樂州改爲威州邠寧張欽緒復蕭關山南西道鄭注得扶
州天子御延喜樓見河隴遺民皆爭降詔錄四道兵有勞者差
賜之戍者倍其資饒再歲一代商賈聽其往來毋禁宰相率百
僚奏自太宗平薛仁果得隴上地擒李執得涼州破吐谷渾高
昌開四鎮元宗繼收貴河磧石宛秀等軍中原無警者幾百年
輪臺伊吾屯田禾菽彌望開遠門揭署西極道九千九百里示
戍人無萬里行也乾元後隴右劔南西山三州七關軍鎮監收
三百所皆失之今不勤一卒血一刀而河湟自歸請上天子尊
號帝歸功先朝嘗覽天下圖見河湟舊封赫然思經畧之今當
述祖宗之烈夸顯後世又詔朕姑息民其山外諸州須後經營
之七年恐熟爲鄯州城使張季頤所破北庭回鶻僕固俊斬之

吐蕃遂滅

附載 吐蕃二

張義潮 曹義金

孫超 李文謙 陳延壽
折通嘉施申師厚

尙波子

折通阿喻丹喻龍波
當尊折通游龍鉢

潘羅支

斯鐸督

唃廝囉

董璘

鬼木征
章

阿里骨

唐征

龍穆

宣宗既復河隴明年沙州首領張掖人張義潮陰結豪英繕甲
兵且耕且戰共漢人振甲謀州門守者驚走推義潮攝州事遂
奉表并地圖以瓜沙甘肅伊等十一州來歸帝嘉其忠賜號歸
義軍卽拜節度使領河沙甘肅伊西等州觀察營田處置等使
悉復諸州咸通中河渭州將尙延心及渾末部皆來降拜延心
武衛將軍河渭等州都游奕使自是種族衰弱無所統一渾末
者蕃部出師必發豪室各有奴從平居散處田牧畏恐熟亂相

與嘯聚合計萬帳以噏末自號八年義潮入朝擢右神武統軍
賜第及田卒命族子惟深守歸義軍五代梁太祖時其後亦絕
州人推長史曹義金領州務唐莊宗授以歸義節度瓜沙等州
觀察處置等使晉天福五年卒子元忠嗣周顯德二年來貢進
檢校太尉同中書門下平章事宋建隆三年加兼中書令子延
恭瓜州防禦使太平興國五年卒贈煥煌郡王長子延祿遣人
來貢授本軍節度弟延晟瓜州刺史延端衙門都虞候咸平四
年封延祿譙郡王五年爲從子宗鼎所害因權知留後表求旌
節授檢校左僕射以其弟完允知瓜州子賢順衙內都指揮使
祥符末宗壽卒賢順嗣爲節度而以延惠知瓜州表乞金字藏
經泊茶藥金箔詔賜之至天聖初遣使來謝貢乳香硃砂玉匣
自景祐至皇祐中七貢方物

其在西京州者自立守將唐長興四年權知西涼留後孫超遣大將拓拔承謙及僧道耆老楊通信等至京師求旌節明宗問所由來荅曰吐蕃陷涼州唐發鄯州兵二千五百往戍遇黃巢亂天下阻絕兵不得返超及涼州漢人皆其子孫也乃拜超節度使清泰元年留後李文謙來請命晉天福七年文謙被逐靈武馬暉遣牙將吳繼勳代爲留後明年晉高祖遣涇州押牙陳延暉賚詔誓安撫涼州州人共劫留之立延暉爲刺史至漢隱帝時涼州土豪折道嘉施來請命卽以爲節度使周廣順二年嘉施遣人市馬京師因來請命時樞密王峻用事奏起故人申師厚爲左衛將軍河南節度使往涼州旣至奏薦副押衙崔虎心陽妃谷首領沈念殷等及中國留人子孫王廷翰溫從樂劉少英爲將吏自安國鎮至涼州立三州以控扼諸部用其豪將

爲刺史以皆蕃漢雜處不能撫有至世宗時師厚留其子逃歸
坐貶不復命帥宋建隆二年靈武五部以乘駝良馬致貢來雜
等八部部長越兒等殺送入界勅書獎諭朝廷置采造務取材
木供億京師秦州首領尙波子殺傷采造務卒勅書寬宥還其
舊地仍賜以錦袍銀帶尙波子等感悅是秋以外蕃地來獻乾
德四年回鶻人二百餘并漢僧六千餘欲往天竺取經爲蕃部
刼略知西涼府折迪葛支送達甘州詔褒荅之五年首領間通
哥督延督南割野麻里六人來貢馬開寶六年涼州遣步奏官
僧耆檀聲通勝拉闢二人求通道涇州以申朝貢詔令涇州牙
將至涼慰撫是後秦州大石小石族寇土門略居民安家族寇
長山諸族並寇略三陽麻穰弓門等砦俱知州監軍巡檢使張
炳韋韜周承瑨任德明耿仁恩等屢會兵擊敗之太宗下詔本

以三族等懸慕王風聿求內附俾之安輯咸邇底寧近聞乘蕃
育之資稔寇攘之志敢忘大惠來擾邊疆今後或更剽剋吏卽
捕治寘之于法不須以聞太平興國三年寇八狼砦巡檢劉崇
讓擊敗之梟其帥王泥猪首以徇三月小迴族寇慶州知州慕
容德豐擊敗走之八年諸種部長以馬來獻召對于崇政殿厚加
慰撫賜以束帛因詔宰相吐蕃自唐室以來頗爲邊患以國家
兵力雄盛聊舉偏師便可驅逐數千里外但念其種類蕃息安
土重遷倘因攘除必致殺戮所以置於度外存而勿論也九年
秋來獻羊馬苔以茶絹淳化初秦州大小馬家族獻地內附二
年權知西涼州左廂押蕃落副使折逋阿喻丹來貢四年死代
以其弟喻龍波爲保順郎將五年來貢馬時折平族大首領護
遠州軍鑄督延巴率六谷諸族來貢有詔辭之復擢登聞鼓官

儀州八族等侵奪地土上降勅書告諭之是歲振武軍都羅族
大首領並來貢馬至道元年涼州蕃部當尊貢良馬引對慰撫
加賜虎皮歡呼致謝二年四月李繼遷擾邊折平族首領握散
順會兵靈州以備討擊賜幣答之七月喻龍波與吐蕃都部署
沒噉拽于會六谷蕃衆來朝且獻名馬上厚賜之涼州復來請
帥詔用丁惟清知州事賜以牌印咸平元年十一月河西軍副
使歸德將軍折通游龍鉢來朝其先四世受命爲長雖貢方物
未嘗自行今始至獻馬二千匹河西軍卽古涼州平川二十里
東底故原州南界蘭州西界甘州舊領姑臧神烏蕃永昌松嘉
麟五縣戶口繁盛有漢民三百戶城圍十五里如鳳形相傳李
軌舊治也其軍分左右廂游龍鉢任左廂實參戎事朝廷務緩
懷之授安遠大將軍領宥州刺史六族首領補下箕等三人皆

爲懷化將軍二年以儀州延蒙八部都首領渴哥領化州刺史
首領透逋等爲懷化郎將

四年西涼府六谷都首領潘羅支願戮力討繼遷詔授鹽州防
禦使兼靈州西面沿邊都大巡檢使遣部下李萬山率兵討賊
貽書知鎮戎軍李繼和請師期詔許之五年十月繼遷遣二人
送鐵箭來誘戮一箭一來取朝旨詔褒諭之聽自處十一月貢
馬五千匹厚給其價別賜絲百段茶百斤六年又遣呼逋族蕃
官成逋馳騎至鎮戎軍請會兵邊臣疑其詐護送部署司城逋
懼逸馬墜崖死上素聞其勇族人所畏與父泥埋俱有戰功嘆
息禮葬又遣蕃官吳福聖臘上表感朝廷恩信憤繼遷倔強已
集騎兵六萬乞會王師收復靈州詔進羅支朔方軍節度押蕃
落等使賜以鎧甲器幣吳福聖臘安遠將軍次首領元佐等七

人懷化將軍六月知渭州曹瑋言隴山西延家族首領禿逋等
納馬立誓乞隨王師討賊詔授本族軍主其八月者龍族首領
來貢名馬上嘉與羅支嘗協力抗賊優待之十一月繼遷來貢
丁惟清陷沒羅支僞降未幾集六谷諸豪及者龍族合擊繼遷
大敗中流矢死景德元年二月遣其甥厮陀完來獻捷六月其
兄拜逋支入奏前賜牌印官告衣服器械咸爲賊劫詔別給且
請授助官兵更率部族及回鶻精甲直抵賀蘭山討除殘孽詔
逋原部署陳興等候羅支已發卽率衆鼓行赴石門策應又因
修洪元大雲寺詔賜金帛物綵先是繼遷欲陰圖羅支遣其種
落迷般喝及日逋吉羅丹二族亡歸者龍族至是來攻羅支率
百餘騎急赴將議合攻爲二族戕于帳詔贈武威郡王錄子失
吉歸德將軍厚恤其家賜以器幣者龍凡十三族其六族附賊

餘聞羅支遇害率龍谷蘭州宗哥覓諾諸族來攻六族悉窺山谷詔遣使安集之而弟斯鐸督立

斯鐸督立爲六谷諸豪所共推爲首領官爵皆如故爲人剛決平恕每會戎飲食必先卑者犯令雖至親不貸數更戰伐威名甚著是歲涇原路言隴山縣王狸延三族歸順渭州又言龍谷懶家族首領尊璽磨壁余龍及便噶等各獻名馬願率所部助討不附者自今西涼市馬道出本族保無他虞詔賜馬直授便噶等郎將於是河西諸蕃四十五族皆內附。遷黨寇永寧爲藥令族合蒜聯敗之斬首百餘級先叛去蕃官茄羅兀賊成王等三族及穆移重王率屬歸順請獻馬贖罪特詔宥之二年鐸督遣其甥阿昔來貢仍上戰趙德明功狀其蕃帳周斯那支有智勇久參謀議請授六谷都巡檢使上嘉獎從之仍賜茶綵者龍

七族首領有卅寇勢並月給千錢西涼樣丹族上表求市弓矢
故事不許上以宣力西陲特令渭州給賜因別賜鐸督以重恩
意三年復遣安化郎將路黎奴來貢病卒遣醫加賜及聞部落
疾疫賜以白龍腦犀角硫黃安息香白紫石英等藥凡七十六
種上以通靈米平糶其腹背攻制進爲檢校太傅本族首領李
波逋等四十九人檢校太子賓客外姻合窮波葉羅等官亦如
之復從其言乞就京資馬市所須物渭州又言妙娥延家熟崑
等族內附率三千餘帳萬七千餘口及羊馬數萬敕塞詔遣使
撫勞賜以袍帶茶繒仍拜折平族首領撒逋渴爲順州刺史充
本族都軍主是年宗家當宗章逃族來貢移逋撫父族歸附上
憫故時諸蕃鈔劫爲惡收質子弟有終身禁錮者悉詔縱釋之
四年德明謀劫西涼裝回鶻上思二番久推忠順欲撫寧之道

諭鐸督令援結爲備并賜茶藥襲衣金帶及部落物奉表稱謝
祥符元年十一月宗哥族大首領溫通等來貢因其族瘴疫賜
以藥餌四年鐸督遣贈蘭氊單來貢賜紫方袍五年遣子來貢
者龍族都首領捨欽波遣使詣闕獻馬詔從其請賜以印仍優
賚之先是蕃部聞知秦州張佖欲近置釐木場卽徙帳去未
幾輒悔因鄉導鈔劫佖深入掩擊悉敗走求和不許七年置大
落門新砦時熟戶賞樣丹作文法謀叛郭廝敦密以告秦州曹
瑋二蕃皆大族約半月殺之至期果携首來上恐陰爲誣害不
欲明加恩獎以疑懼諸族乃假廝敦獻地築南使城爲名詔授
順州刺史俄爲本族軍主賦以俸祿及瑋破魚角蟬戮賞樣丹
其前拒王師者伏匿避罪瑋恐生變誘許納馬贖罪始皆畏服
八月伏羌砦廝難波與宗哥族李磨倫聚爲文法瑋領兵趣之

悉潰散平其城帳九月瑋又破宗哥誦厮囉羌族馬波叱臘魚
角蟬等由馬街山蘭州龜谷羶毛山洮河河州至伏羌砦三都
谷斬馘千餘擒七人獲馬牛雜畜衣服器仗三萬三千以功授
吹麻城張族都首領張小哥順州刺史瑋又召永寧砦隴波他
厮麻二族納質不從率兵擊之斬首二百級十一月詔給秦州
七砦熟戶首領都軍主以下百四十六人告身天禧元年又捕
大馬家族阿厮鐸爲本族軍主十月鬼留家族累歲違命秦州
部署討平之二年吹麻城及河州諸族皆破宗哥文法來附還
舊地諸砦蕃族及空俞厮雞波等納質者凡七百五十六帳
唃厮囉本出贊普後羌語訛贊普爲錢逋因名欺南陵溫錢逋
生高昌磨榆國年十二狀貌奇偉河州蕃何郎業賢爲客見之
挈以歸置剡心城大姓聳昌厮均又以居移公城欲於河州立

文法河州人謂佛喚爲兒子自此名喚厮羅時宗哥伯李立遵

逸川大將溫逋哥略取厮囉如郭州尊立之部族寔驍乃徙居

宗哥城

其城東南至永寧九百餘里東北至西涼西北至甘州皆五百里東至蘭州三百里南至河州四百餘里又東

至龕谷五百五十里又西南至青海四百里又東至新渭州千八百九十里立遵爲論逋相之國人

以立遵貪且喜殺戮多不附旣而與曹瑋戰三都谷不勝又襲

西涼爲所敗遂與厮囉不協更徙逸川表求贊普不許以逋哥

爲論逋有勝兵六七萬與趙德明抗希望朝廷恩命授以保順

軍節度使賜襲衣金帶器幣鞍馬鎧甲等件祥符八年遣使來

貢又賜袍帶供帳什物茶藥其年立文法聚衆數十萬請討平

夏以自效上以其多詐或生他變命周文質監涇原軍曹瑋兼

兩路沿邊安撫使以備之九年復請獻馬詔荅賜器幣總萬二

千數使人赴瑋求內屬明道初授寧遠大將軍愛州團練使逋

哥歸化副軍已而遁哥爲亂欲囚斯羅反爲所殺徙居青唐景祐中進保順軍節度觀察留後歲令秦州就賜俸錢元昊侵略其界兵臨河湟斯羅知衆寡不敵壁鄯州不出陰間元昊頗得其虛實數以奇計破之遂不敢窺凡遇渡河插幟志其淺潛使人移植深處以誤之後潰歸士視幟渡溺死十八九擒獲甚衆及元昊取潘羅支舊部多歸者又得回紇種人數萬所居鄯州西有臨谷城通青海高昌諸國商人皆往貿易漸以富強寶元初授本軍節度使仍兼逸川大首領時元昊反遣左侍禁魯經持詔往諭使背擊元昊以披其勢賜帛二萬奉詔出兵嚮西涼知其有備捕殺遊邏數十亟還聲言以圖再舉仁宗又遣屯田員外郎劉渙傳詔旣至迎導及供帳甚厚介騎士爲先驅引至庭廡羅冠紫羅氍冠服金線花袍黃金帶絲履平揖不拜延坐

勞問稱阿舅天子安否道傳事數十二辰屬曰兔年如此馬年如此已而詔部豪大犒約盡力無負然終不能有大功後累加恩兼保順河西兩節度洮涼兩州刺史檢校司空賜功臣號食邑器幣鞍馬嘉祐三年捺羅部阿作等叛歸諒祚乘勢引兵攻掠境上與戰敗之獲渠豪六人及駝馬頗衆因降龍逵公立馬頗三大族會契丹使者送女妻其子董璫乃罷兵歸治平二年夏遼奔及阿叔溪心以隴珠阿諾三城叛諒祚來歸厮囉不禮復歸諒祚再請兵還取所獻地諒祚不之罪出萬餘騎隨取不能克但取遼川歸丁家五百餘帳而還其年冬死年六十九以第三子董璫嗣其母喬氏有色居歷精城所部六七萬人號令嚴明咸悍服之璫方少擇部長子年相若者與之遊衣服飲食如一以此能附其衆自九歲請于朝命爲會州刺史封喬氏大

原郡君其次妻李立遵女生瞎璉及磨璉角立遵死李氏寵衰
斥爲尼署郭州并錮二子瞎璉居龕谷屢迴貢授澄州團練使
先死其子木征不能自立青唐族人瞎樂雞囉及僧鹿遊迎居
洮州欲立以復洮岷壘宕武勝軍諸部秦州以其近邊逐之復
還河州後徙安江城董璉欲轄屬之不能母弟瞎吳叱別居銀
川至和初補本族副軍主王詔遣僧智圓往說喚以厚利隨之
以兵前後殺老弱數千焚族帳萬數得腹心首領十餘禽其妻
子皆不殺乃於熙寧七年四月舉洮河二州來降賜姓名趙思
忠拜榮州團練使秦州鈐轄詔於二州給地五十頃後遷合州
防禦使卒贈鎮洮軍節度觀察留後妻包氏咸寧郡君弟董合
補六宅副使賜名繼忠結吳延征口濟忠瞎吳叱曰詔忠巴璉
角曰順忠巴璉抹曰存忠子蓋哢曰秉義皆超拜官磨璉角陰

結母黨李巴全竊其母奔宗哥城厮囉不能制磨璫角因撫有
其衆累來奉貢補嚴州團練使改思州卒李氏寶元二年恩賜
紫衣所部立其子瞎撒欺丁李氏懼孤弱不能守乃獻皮帛入
庫廩文藉于厮囉受之嘉祐三年命爲順州刺史封李氏遂寧
郡太夫人時董瓊最彊獨有河北之地其後河州武勝軍諸族
寢驕閉于闐諸國朝貢詔邊將問罪獨瓊遣使奉貢初授節度
檢職如故神宗加太保進太傅封常樂郡公母封安康郡太君
子闌迪叱錦州刺史熙寧三年乘夏人寇環慶入其境大攻克
獲賜璽書袍帶獎激十年貢眞珠乳香象牙玉石并馬詔遣供
奉官鄭英賜器幣銀綵茶服緡錢改西平節度使元豐二年遣
景青宜党令支貢方物賜錢萬緡銀綵千計授令支珍州刺史
三年邈川城主溫訥支郢成及叔溪心弟阿令京等款塞授郢

成會州團練使溪心內殿崇班令京西頭供奉官餘族人皆殿
直奉職四年王師討夏遣渠長抹征等率三萬人赴党龍耳江
及隴朱珂諾有集六部兵十二萬約以八月分三路與官軍會
朝議協濟軍威事功可紀進封武威郡王首領青宜結鬼章令
夏皆團練使心牟欽璽阿星李叱臘欽威爲刺史拒絕夏人欲
與通好許賂斫龍以西地官爵一如所欲不納遣使來告調整
兵甲以俟入討帝知逸川事力不足與抗但欲解散其謀使不
結和召見使者歸語董璽盡心守圉每稱其上書情辭忠智然
終不能大有功哲宗加檢校太尉有疾召諸將領語以吾一子
已死惟阿里骨少從其母事我我視之如子今將付以種落何
如諸將聽命未幾死阿里骨嗣

阿里骨者本于闐人初爲刺史元豐之戰最爲有功加肅州團

練進防禦使遣使修貢元祐初起復冠軍大將軍檢校司空河西軍節度使封寧塞郡公頗峻刑殺其下不遑寧二年遂遁鬼章率衆拒洮州將結藥密使所部怯陵來告因被執結藥密懼携妻子南奔八月又使鬼章子結呪嶠入寇心牟欽瑄溫溪心不肯從共擒鬼章檻送京師尋赦之授陪戎校尉遣居秦州聽招里骨自贖諭以朝廷恩信及前人付與之意明年奉表謝罪詔熙河無復出兵許貢奉如故仍加金紫光祿大夫檢校太保封其妻溪尊勇丹安化郡君子邦彪錢鄯州防禦使南納支西州刺史時郭州主魯尊欲焚拆河橋歸漢朝議里骨旣通貢不可有納叛之名弗納鬼章死詔焚付其骨紹聖初來獻獅子帝慮非土性厚賜還之死年五十七賡征嗣

賡征者卽邦彪錢也朝廷封爵如故性嗜殺部曲睨貳大將咸

有異志忘季父蘇南党征雄勇多智共誣其謀逆不能察遂殺之盡誅其黨獨籛羅結逃奔董瑄疎族溪巴溫先於阿里骨時依隴通部河南諸將多歸之及是奉其長子杓搜據溪哥城瞎征聞而討殺之籛羅結復奔河州說王瞻以取青唐之策已而巴溫入溪哥城自稱王子元符二年七月瞻取邈州八月瞎征自青唐脫身來降欽玗迎巴溫入青唐立木征之子隴拶爲主九月瞻軍至青唐隴拶出降其種人本無歸漢意議者謂今不先修邈川以東城障而遽取青唐其不可守有四一白炳靈寺渡河四百里道險地遠緩急聲援不相及彼若斷橋塞隘雖有百萬之師亦不能進二王瞻提孤軍以入外無援兵必生他變三設遣大軍內地無糧可運青唐宗哥邈州止可支一月食難以久處四官軍自會州還者皆憔悴衣屨穿決器仗不全吐蕃

輕視官軍旦夕必叛閏九月欽璫等果與青唐人相結謀復奪城山南諸部亦叛膽遣將破之戮結哱儼及欽璫等九人青唐圍解而邈川益急夏人十萬助之總管王懋力戰固守膽棄青唐歸巴溫與其子溪賒羅撒據之朝諭請并棄邈川時董璫無後醜抄乃喃厮囉嫡曾孫詔乃拜爲河西軍節度使知鄯州封武威郡公充西蕃都護依府州折氏世世承襲尋賜姓名曰趙懷德其弟邦辟勿丁哱曰懷義爲廓州團練使同知涇州加賸征檢校太傅懷遠軍節度使三年三月懷德及所降契丹夏國回鶻公主入見各賜冠服徽宗命輔臣問何以招致溪巴溫對曰譬如乳牛繫其子卽母須來繫其母卽子須來侯至岷州當遣人往諭使之歸漢遂與賸征俱還涇州溪賒羅撒謀襲殺之懷德奔河南至京師帝御端門受其降拜感德軍節度使封安

化郡王賸征不自安求內徙詔居鄧州而死

弘簡錄卷二百五十

終

弘簡錄

卷二百五十

三

附錄吐蕃二